

'Sëédhë -blëézë
'ö Pɔlö -ya bɔ
-Zlan -bha mɛ -nu 'wo
Kolentö
plöö -an -dhë bhë 'ö =nɛ

1 ¹'Sëédhë 'ö =nɛ, ma Pɔlö 'ö -Zlan -zo 'kun -wun 'ka, 'yö n sü kö 'aan-kë Yesu Klito -bha bɔmɛ 'ka bhë =nɛ 'ö yië- kwa dheglu 'nëgɔɔnzë Sɔtenë ²'yi- bɔ -Zlan -bha mɛ -nu 'ka Kolentö, dhegluzë -nu 'saadhö 'ö -Zlan -bha -dhɔɔ -yö yö ka -bha kö 'kaan- kë -a -bha 'ka 'ö 'ka- -bha 'ka, kaa- Yesu Klito -nu ka -bha -kë do -sü 'gü bhë -a -wun 'gü, waa- mɛ -nu 'saadhö 'ö -dhe 'töüdhö 'gü 'ö 'ka =bhe'a' Dëmɛ Yesu Klito, ka Dëmɛ 'ö yi Dëmɛ 'ka 'pö bhë -a 'tɔ 'gü bhë ka -dhë. ³Kö kwa Dë -Zlan, waa- kwa Dëmɛ Yesu Klito -wo 'dhuë- 'kpɔ ka -bha, -wo ka gbaa =zuöyagluu 'ka.

-Zlan zuö pö -wo 'ö -kë 'wun -së -nu -wun 'gü

⁴A ma -Zlan zuö -pö -kplawo ka -wun 'gü 'wun -së -nu 'ö- -kë ka -dhë =bɔa' Yesu Klito 'gü -sü 'ka bhë -a -wun 'gü. ⁵Ö tɔɔ kaa- Yesu Klito -nu ka -bha -kë do -sü 'gü, 'ka kë -bhɔɔzë gbaɔ -nu -wun 'gü; 'kɛɛ gbaɔ -nu mɛ 'wo -gban -a -wo =blɛɛ' -wo waa- 'wundɔdhe -an -bha bhë wo -mü. ⁶Tɔmɔdhe 'ö -kë Klito -bha bhë, -a -wun bhë -gban 'ö- wo kpinnghö ka 'gü bhë, ⁷yö -ga 'ö mɛ -nu 'ö 'ka -ya kwa Dëmɛ Yesu Klito -bha nu -yi -gɔ bhë 'ö -Zlan -bha gbaɔ -nu bhë 'ö- gbɛ yaa 'kun ka 'ka bhë. ⁸Yö =nɛ 'ö dho -a kë kö 'kaan- dɔ genngdhö kö -yö 'dho -yö yöë -a 'dhiötodhe -bha; -yö kë 'pö kö =kun 'ö mɛ gbɛ dho 'wun yö ka -bha, kwa Dëmɛ Yesu Klito nu -yi 'ka. ⁹-Zlan 'yö ka =dhɔɔ -kë kö kaa- -a Gbö Yesu Klito, kwa Dëmɛ 'kaan- kë do bhë, -yö -Zlan 'ö to 'ö -wo -ta 'ö -bha 'tɔ 'go -pë -nu 'gü -a 'ka.

'Gügludhe 'ö -da -Zlan -bha me -nu ziën Kolentö

¹⁰N dhegluzë -nu, a- -dhe ka -gɔ kwa Dëme Yesu Klito 'tɔ 'ka, kö -kë do -sü -yö kë ka -gɔ; kö -kun 'ö 'gügludhe -yö -da ka ziën. -Kë do -sü -yö kë ka -gɔ 'fɛfɛdhö, kö ka -zo -ta -a 'gü -wun waa- ka -bha 'wun 'dho 'gbloo -waan kë do. ¹¹'Wun 'a- -blɛɛ 'dhö bhë, n dhegluzë -nu, 'ö tɔɔ mɛ -nu 'wo go Kloe -gɔ kɔɔ =nɛ 'wo nu 'ö 'wun -nu 'wo -gban 'dhinaa 'ö -kë 'ma bhë -a -bha 'wo -blɛɛ n -dhë. ¹²'Ö tɔɔ mɛ =ya =luu' -de 'ö- pö: «A -bɔ Pɔlö 'ka»; -a mɛ 'bhaa =ya =luu' 'nö 'ö- pö: «A -bɔ Apolɔsö 'ka»; 'ö- mɛ 'bhaa -yö bɔ -de 'ö- pö: «A -bɔ Pɛɛ 'ka»; 'ö mɛ gbɛ 'bhaa -yö bɔ -de =zian' 'zü 'ö- pö: «A -bɔ Klito 'ka.» ¹³Kö kë- wo ka -gɔ bhë, Klito -yö -glu -sü 'ka 'pian =plëzë 'ka e? 'Iin ma Pɔlö =nɛ 'pö 'a ga -gaatalü -bha ka =wuën' =e? 'Iin -wo ka -bɔ yiö n 'tɔ 'ka e?

¹⁴A -Zlan zuö -pö, mɛ gbɛ bɔ 'ö n 'ka- wo yiö Yesu 'tɔ 'ka ka ziën -a 'ke yaa kë Klipusö waa- Gayusö -an 'ka bhë -a -wun 'gü. ¹⁵Bhii =ya kë 'pö mɛ gbɛ yaa 'dho -a pö ma =nɛ 'wo ka bɔ yiö n 'tɔ 'ka. ¹⁶Mɛ mɛ 'ö n -zlö 'dhoë-trö -a 'ka bhë 'ö tɔɔ Sefanasö waa- ö -bha 'kɔɔmɛ -nu. 'Kɛɛ =ya 'kan -a -bha n 'ka mɛ 'waa gbɛ bɔ yiö. ¹⁷Kë- wo 'dhö bhë, Klito yaa n bɔ kö 'aan- mɛ bɔ yiö; -yö n -bɔ =zian' kö 'aan- 'wuntaɔsë =blɛɛ'-; 'iin kö -kun 'a- -gban mɛbheedhe -bha 'kpaakpadhe -ta, -yö kë 'pö kö -kun 'ö Klito -bha -ga -gaatalü -bha -sü 'ö bhë 'ö- -wun dho to 'kpaan.

**Yesu Klito -bha -kë -Zlan -bha 'piigbeedhe
waa- -a -bha 'kpaakpadhe 'ka -sü**

¹⁸'Wun =blɛɛ' -wo 'ö -gban Klito -bha -ga -gaatalü -bha -sü -bha bhë, mɛ -nu 'ö 'wo 'gü =siö' -zian -ta bhë, -yö -an -dhë 'blɔɔn- -wun 'ka. 'Kɛɛ mɛ -nu 'ö 'kwa dha -zian -ta bhë, -yö kwa -dhë -Zlan -bha 'piigbeedhe 'ka. ¹⁹Bhii pë 'ö =bɛɛn' -sü 'ka -Zlan -bha 'sëédhe 'gü -ya -pö: A -dho mɛ -nu 'wo 'kpaakpa -an -bha 'kpaakpadhe 'gü =siö', 'a 'wundɔmɛ -nu -bha 'wunbhokoudɔdhe -zuö -kɔ =taa. ²⁰=Ya kë 'pö -mɛ 'kpaan 'ö mɛ 'ö 'kpaakpa 'ö dho -a pö 'zü i? -Mɛ 'kpaan 'ö 'wundɔmɛ -nu dho -a pö 'pö e? 'Iin 'ö zaɔdhekɛmɛ 'ö 'kpongtaa zö 'ö dho -a pö =e? Bhii 'ö tɔɔ 'kpaakpadhe 'ö 'kpongtaa zö bhë, -Zlan =ya -dhe 'po -a -ta -a -zɔɔn -sü 'ka =nɛ -yö 'blɔɔn- -wun 'ka.

²¹'Ö tɔɔ 'kpongtaame -nu -bha 'kpaakpadhe -kɔ yaa -mɔ -a -bha kö -ya pö -Zlan -bha 'kpaakpadhe 'ö =nɛ, kö -dhe 'ö -Zlan 'dhoë- -bha, -yaan -zɔɔn mɛ -nu -dhë. -A -wun 'gü 'ö -Zlan -ya -kë 'ö- -bha 'kpaakpadhe 'ö mɛ -nu -wa -dhe 'blɔɔn- -wun bhë 'ö 'kwa- -wun =blɛɛ' -na kö mɛ -nu -waan dha -a -wun -dhe 'wun gia- -sü 'ka bhë. ²²'Ö bhii pë 'ö Zuifö -nu 'dhoë- 'piö 'ö tɔɔ -dhidhaapë, kö 'wo -gban -a -ta; yö =nɛ 'ö Glɛkö -nu -bha -yö -kë 'kpaakpadhe 'ka 'pö. ²³'Kɛɛ =ya kë kwa -bha 'ka, Klito 'ö dɔ -gaatalü -bha bhë =nɛ 'ö 'kwa- -wun =blɛɛ'. 'Wun bhë -yö -yö yaan -sü 'ka Zuifö -nu -dhë 'ö 'blɔɔn- -wun 'ka mɛ -nu 'waa Zuifö 'ka -an -bha 'ka. ²⁴-Yö 'dhö, 'kɛɛ mɛ

-nu 'ö -Zlan -yö -an -dhɔɔ -kë, -wo Zuifö 'ka 'iin 'waa Zuifö 'ka, Klito 'ö bhë, -yö -an -dhë -Zlan -bha 'piigbeedhe waa- -a -bha 'kpaakpadhe 'ka. 25 Bhii -Zlan -bha 'wun 'ö mɛ -nu -dhë 'blɔɔn- -wun 'ka bhë, -yö 'kpaakpa -wun 'ka 'ö -zië' mɛ -nu -bha -ta; 'ö- -bha pë 'ö 'tëëtë mɛ -nu wö 'dhiö bhë, 'ö -faanzë 'ö -zië' mɛ -nu -faan' -ta.

26 Ka gia-, -ka -dhe -ga bhë 'dhe, n dhegluzë -nu; mɛ -nu 'ö -Zlan -yö ka -dhɔɔ -kë 'ö ka kpö 'dhö do bhë, -ka -an -ga mɛ medhe -bha bhë 'dhe! Ka ziën 'wundɔmɛ -nu, mɛ -nu 'ö -wogbiindhe 'dhö -an -gɔ 'iin mɛ -nu 'wo go 'gunng -gɔ =vava -nu 'gü 'waa =va. 27 Kɛɛ kɛ- wo 'dhö bhë, pë 'ö 'kpongtaame -nu -wa -dhe 'blɔɔn- -pë bhë -Zlan -ya -sü 'ö lë- kpɔa mɛ -nu 'wo 'kpaakpa zö bhë -an -ta, 'ö pë 'ö -faan' 'yaa- 'gü 'kpongtaame -nu -dhë bhë, 'ö- sü 'yö lë- kpɔa 'gü 'gbee- -mɛ -nu -ta. 28 Pë 'ö 'kpongtaame -nu -dhë pë 'ö- -wun 'yaa 'gbee-, 'ö 'wo -mɔa -waan -zuö wo -kɔ =taa 'ö 'yaa -an -dhë pë gbe 'ka bhë, -Zlan -ya -sü 'ö pë 'ö- -wun 'dhö 'gbee- -a wö 'dhiö 'ö- 'gü -siö -a 'ka. 29 Ya kɛ 'dhö kö mɛ gbe yaa 'dhö -mɔa kö -yö ö -de 'sü =va -Zlan wö 'dhiö. 30 Kɛɛ -Zlan -ya ka kpa Yesu Klito -bha, =ya ka kɛ do; 'go mü 'ö =yaa- kɛ kwa -bha 'kpaakpadhe -go -a 'gü -mɛ 'ka; kwa -bɔ Klito -ta 'ö kwa -kë kpengdhö -Zlan wö 'dhiö, 'ö kwa -kɔ -mɔ -a -bha kö 'kwa -tosiadhe kɛ -Zlan -bha 'ka; 'go mü 'yö kwa bho kɛpɛyaame -gɔ 'gan 'gü. 31 A -wun 'gü pë 'ö =bɛɛn' -sü 'ka =ya pö: *Mɛ 'ö- 'piö kö 'yö ö -de kɛ 'gɔugɔ, kö -yö -dho ö -de kɛ 'gɔugɔ pë 'ö kwa Dɛmɛ -ya -kë -a -wun 'ka.*

'Wun 'ö -gban Klito 'ö dɔ -gaatalü -bha -a -bha

2 1 N dhegluzë -nu, nu 'a- wo ka =plöö 'ma bhë, 'wun 'ö -gban -Zlan -bha 'wun giagia 'ö -bin -sü 'ka bhë, -a -blɛɛ' -'a- wo bhë, n 'ka- kɛ 'wun =blɛɛ' -wo 'ö- 'gü ma -sü 'dhö 'gbee- 'iin 'wun -yö 'ko 'dhiö -kɔ -suu' -'bhaa gbe 'ka; 2 'ö tɔɔ 'töng 'a -kaa' ka 'piö 'ma bhë, n -zo yaa kɛ 'wun gbe 'waa 'piö -a 'ke yaa kɛ Yesu Klito -wun 'ka. 'Ma- pö 'dhö kö a- -pö Yesu Klito 'wo- dɔ -gaatalü -bha bhë. 3 A -wun 'gü =nɛ 'ö nu 'a- wo 'ma bhë 'a n -de -kɛ 'tee 'iin 'ö 'suö =va -yö -kɛ n -ma. 4 Yö =ga 'ö ma mɛ =daan' -wo -nu waa- n -ma -Zlan -wo =blɛɛ' -wo -nu 'wo bhë 'ö waa -gban mɛ 'bhee- -bha 'kpaakpadhe -ta, 'kɛɛ 'wo -gban -Zuu 'slööslo -bha 'wun -ga mɛ 'gü -sü 'ö -kɛ -dhidhaapë -nu 'ö -kɛ 'ö mɛ 'plɛ 'yan -yö -da -a 'gü 'ö- -gɛn go -Zlan 'piö bhë -a -ta. 5 Yö kɛ 'dhö kö -kun 'ö 'ka dho ka -bha -zo -yö -Zlan -bha -sü -gban mɛ 'bhee- -bha 'kpaakpadhe -ta 'kɛɛ kö -yaan -gban -Zlan -bha 'piigbeedhe -ta =zian'.

-Zlan -bha 'kpaakpadhe

6 Kɛ 'ö- wo 'dhö bhë, yi 'kpaakpadhe -wun -blɛɛ mɛ -nu 'ö =wa kɛ mɛ -dee -nu 'ka -Zlan -bha 'wun -nu 'gü bhë -an -dhë. 'Kɛɛ yaa kɛ =nɛ 'kpaakpadhe 'ö go 'kpongtaa 'iin 'piigbeedhe -nu 'ö 'wo -ya -sü 'ka 'kpongtaame -nu -gɔ 'dhiö 'ö 'wo -ya -sü 'ka kö -an 'gü -yö -siö' -bhë =nɛ 'yi

-an -bha 'kpaakpadhe -wun =blɛɛ. 7-Abi'; -a mɛ 'yi- -blɛɛ 'ö tɔɔ -Zlan -bha 'kpaakpadhe 'ö -bin -sü 'ka mɛ 'bhee- -nu -gɔ bhë; -Zlan -ya -ya 'dhö 'dhiö kö 'kpongtaadhe yaa kɛ -kun kö -yaan kɛ kwa -bha 'tɔbhɔdhe 'ka yi 'ö 'kwa dho -da -a 'ka =toëpö -kɛ -a 'gü -sü bhë -a 'gü bhë -a 'ka. 8Yö =ga 'ö 'piigbeedhe -nu 'wo 'kpongtaa zö bhë 'ö -an gbe yaa- dɔ bhë; 'ö bhii -ya kɛ =nɛ -wa -dɔ -bezë, kö waa 'dho kwa Dɛmɛ 'tɔbhɔsüzë bhë, -a dɔ -gaatalü -bha. 9-A -wun 'gü, pë 'ö =been' -sü 'ka -Zlan -bha 'sëédhe 'gü -ya -pö: *Pë 'ö mɛ gbe 'yan yaa -da -a 'gü do, 'ö yaa- -taɔ ma do, pë 'ö mɛ gbe -zo yaa -lo -a -ta 'gbɛɛdhö bhë, -Zlan -yaa- -wun yö 'ko 'dhiö 'ö -bha mɛ -nu 'wo- -dho -kɛ -a 'ka bhë -an -dhë.* 10Pë 'ö 'dhö bhë, -Zlan -yö bɔ -Zuu 'slööslo 'gü 'ö 'dhe bho -a -ta kwa -dhë; ka gia- ka- -tei' -dɔ =nɛ -Zuu 'slööslo 'ö bhë -yö -dhe -yö 'wun -nu 'saadhö 'gü; -kɔ do bhë 'ö -dhe yöë -Zlan -bha 'wun -nu 'ö- yö 'ko 'dhiö 'ö 'wo -bin -sü 'ka 'fefɛdhö -an 'gü. 11'Ö =ya kɛ =nɛ 'kwa mɛ -nu 'sü do do 'ka, mɛ 'ö -dhö, 'wun 'ö- =zuö' 'gü bhë, mɛ 'kpaan gbe yaa -mɔ -a -bha -yaan dɔ, 'ö yaa kɛ yö -de gia- -a 'ka, -kɔ do bhë 'ö- 'ka -Zlan -bha 'ka 'pö; -Zuu 'slööslo 'ö go -a 'piö bhë =nɛ 'ö 'wun -nu 'wo -gban -a -bha bhë 'ö -an dɔ. 12Yö =ga 'ö kwa 'kwa bhë, -Zuu kwa -gɔ bhë, 'yaa 'kpongtaa -zuu 'ka. -Yö -Zuu 'ö go -Zlan 'piö -a 'ka -yö kɛ 'pö kö pë 'saadhö 'ö -Zlan -ya nu kwa -dhë bhë 'kwaan- dɔ. 13'Ö 'yi mɛ -nu =daan' -na -an -wun 'ka bhë; 'kɛɛ kɛ- wo 'dhö bhë mɛ -nu =daan' 'yi- wo -na bhë 'yiëë- kɛ mɛ 'bhee- -bha 'wundɔdhe 'gbloo 'piö; -yö -kɛ =zian' 'wun -nu 'ö -Zuu 'ö go -Zlan 'piö bhë 'ö- dɔ -na yi 'dhiö bhë -a 'ka. -Kɔ bhë =nɛ 'ö =ya kɛ 'ö 'yi 'wun giagia -nu 'wo -gban -Zlan -bha bhë 'ö 'yi -an 'zü pöë mɛ -nu 'ö -Zuu bhë 'ö -an 'gü bhë -an -dhë.

14-Zuu 'ö go -Zlan 'piö bhë, mɛ 'ö 'yaa- 'gü, yaa -mɔa kö 'wun giagia -nu 'wo go -Zuu bhë -a 'gü -yö -an -gen ma, 'ö tɔɔ -a -bha 'ka 'wun -nu 'wo bhë -wo 'blɔɔn- -wun -nu 'ka; yaa 'dho -mɔ -a -bha kö -ya -gen ma, bhii -wo 'wun -nu -bho 'kou -kɛ -Zuu 'ö bhë -a -kwa'. 15Mɛ 'ö -Zuu 'ö go -Zlan 'piö bhë 'ö- 'gü, -yö -mɔ -a -bha kö -yaan 'wun -nu 'saadhö -bho 'kou kɛ, 'kɛɛ mɛ gbe yaa 'dho -a -bha 'wun -dan 'kuë -kɔ -ga. 16Bhii pë 'ö =been' -sü 'ka -Zlan -bha 'sëédhe 'gü -ya -pö: *Mɛ 'ö dhö kwa Dɛmɛ -bha -zotadhe dɔ kö -yaan pë -zɔn -a -dhë 'yaa 'dhö.* -Yö 'dhö, 'kɛɛ 'ö kwa 'kwa bhë, Klito -bha -zotadhe -yö kwa 'gü; ka- -yö bhë =a?

'Wun 'ö -gban -Zlan -bha yuökème -nu -bha

3 1N dhegluzë -nu, 'wun gia- 'ka, 'wun -nu 'a- =blɛɛ ka -dhë bhë, n 'ka- =blɛɛ' =nɛ mɛ 'wun =blɛɛ mɛ -nu 'ö -Zuu 'ö go -Zlan 'piö 'ö -an 'gü bhë -an -dhë; 'a- -blɛɛ ka 'ka =nɛ -dhe 'wo- pö -a -bha 'kpa mɛ -nu 'ö 'waa -Zlan dɔ wo -mü 'iin 'në 'sɛɛn- -nu -mü -zo -yö -Zlan -bha -sü 'gü -a 'dhö. 2-A =tei' -yö -kɛ =nɛ -kɔ 'wo 'në -nu 'dhi gba -na -a 'ka bhë -a 'dhö. Nɔnɔ =nɛ 'a- nu ka -dhë; n 'ka -bhöpë giagia nu ka -dhë, bhii ka -kɔ yaa -mɔ -a -bhö -sü -bha; 'ö dɔ -de 'kwa- wo =nɛ 'ö ka -kɔ yaa -mɔ -a -bha =kun. 3-A -gen tɔɔ

ka -tun 'ta sü -ne me 'ö 'waa -Zlan dɔ -an 'dhö. Pë -kë 'a- pö 'dhö bhë 'ö tɔɔ -druɛi -kë 'kuë- -sü waa- -dɔn -bho 'kuë -sü -wo -tun ka ziën. Pë -nu 'wo bhë, -wa -zɔn -ne me -nu 'ö 'waa -Zlan dɔ -an 'ta 'sü -kɔ 'ö 'ka- -ta bhë; 'ö -de 'dhö 'dhö bhii me 'bhee- wɔ -kɔ yaa -ne 'ö bhë. ⁴Ka ziën me -ya bɔ -de -yaa- pö: «A -bɔ Pɔlɔ 'ka», iin -a me do 'bhaa -ya bɔ -de -yaa- pö: «A -bɔ Apolɔsɔ 'ka» kɔ ka 'wun kë -kɔ 'yaa -tun -ne me 'bhee- kë -kɔ 'dhö a?

⁵Ya kë -ne 'kwa -dhe -ga -a 'gü -së 'ka, dö -mü Apolɔsɔ 'ka iin dö -mü Pɔlɔ 'ka 'pö e? -Zlan -bha yuökëme -nu 'kpaan, 'ka bɔ -an -ta 'ka Yesu -wun -dhe 'wun gia- wo -mü. Me 'ö -dhö pë 'ö dɔ -a -tian' 'ö kwa Dëme -ya nu -a -dhë kɔ -yaan kë -ne 'ö- -kë. ⁶-Kwaa -zɔn pë ta -sü 'ka, 'kwa -dhe -ga -a 'piö 'dhe! N -ma tɔɔ 'lü 'në ta -sü. Apolɔsɔ -ne 'ö 'yi -lo -a -ta; 'kë kë- wo 'dhö bhë -Zlan -ne 'yö- -kë 'ö 'lü 'në -nu 'wo bhë, 'wo -kpea. ⁷Ya kë 'dhö kɔ me 'ö pë ta waa- me 'ö 'yi -lo pë -ta -an -bha -dɔ -dhe gbe 'yaa- 'gü. Bhii -Zlan do -ne 'ö- 'ple -gen -yö go -a 'gü, 'ö tɔɔ yö -ne 'ö- -kë 'ö 'lü 'në -nu 'wo bhë 'wo -kpea. ⁸Kö me 'ö pë ta waa- me 'ö 'yi -lo pë -ta waa kë me do 'ka e? Bhii me gbe yaa ziö 'ö 'bha -ta. Me 'ö -dhö -Zlan -dho -a 'kian nu -a yuö kë -kɔ -bha. ⁹Yi 'pö, yi -nu 'ko -dhë -me -nu 'ka -Zlan -bha yuö kë -sü 'gü, 'ö ka -zë, 'ka -Zlan -bha =bhlöödhe 'ka; 'ö 'ka- -bha 'kɔ 'ka 'pö. ¹⁰Kë- wo 'dhö bhë 'ö tɔɔ -Zlan -yö 'ö -bha yuö -sü 'ö- dɔ n kwɛɛ 'ö yuö bhë 'a- -kë -ne 'kɔdɔme -kwɛɛ' -së -zë 'dhö, 'ö 'kɔ bhë 'a- =gban 'lü -nu -gban. =Dhe -ya kë 'pö, 'ö me gbe -yö nu 'ö 'kɔ bhë 'ö- dɔ. 'Kë kë- wo 'dhö bhë me 'ö -dhö, -yö 'ö -zo -kë 'ö -de 'piö 'kɔ =luu' -kɔ -wun 'gü. ¹¹Bhii me 'ö 'kɔ -gban 'lü -nu 'dhö -gban -sü 'ka -a 'gü 'ö tɔɔ Yesu Klito. -Ya kë 'dhö kɔ me gbe yaa 'dho =gban 'lü -nu gbe -gban gbɔ 'kɔ bhë -a dɔ -sü 'gü. ¹²Me 'bhaa -nu -wo -dho 'sënn -nu, 'wëü- -nu waa- -guö 'yanbhɔsüzë -nu sü kɔ -waan dɔ 'kɔ -gban 'lü -nu bhë -an -ta, 'ö me 'bhaa -nu -wo 'lü -nu waa- -mlü -gbo -nu sü 'wo 'kɔ dɔa. ¹³'Kë me 'ö -dhö, -a -bha yuö -kaa' -pë -nu -wo -dho yö -dhegbeadhe 'gü -Zlan -bha zakanyi 'ka; 'ö tɔɔ -an 'ple -dho bɔ siöö yi bhë -a 'ka 'ö me 'ö -dhö 'ö- -bha yuö pin -yö yö -dhegbeadhe 'gü. ¹⁴'Ö tɔɔ me 'ö 'kɔ dɔ 'kɔ -gban 'lü -nu bhë -an -ta, 'ö -ya bɔ siöö, 'ö- 'gü yaa -siö', kɔ -a 'kian -dho nu. ¹⁵'Kë me 'ö- -bha 'kɔ dɔ pë -nu bhë 'ö -an 'gü -ya -siö' -siö -kwaa' kɔ -a 'kian 'yaa 'dhö; 'kë kë- wo 'dhö bhë, yö gia- -yö -dho dha; 'kë -a -tei' -yö -dho kë -ne -dhe 'ö dha -a -bha 'siö -gɔ -a 'dhö.

¹⁶-Yö ka 'yaan 'ka -ne -Zlan -bha 'kɔ -mü ka 'ka; 'ö -Zlan -bha -Zuu 'dhö -ya -sü 'ka ka 'gü. ¹⁷Kö -kaa dɔa -ne me -ya -Zlan -bha 'kɔ bhë -a 'wü, -Zlan -dho me 'ö 'dhö bhë -a 'gü -siö' 'pö bhii -Zlan -bha 'kɔ -yö 'slöösLö, 'ö 'ka- -bha 'kɔ 'ö 'dhö bhë -a 'ka.

¹⁸-Kun -kë 'ö me gbe -yö 'ö -de -püö -a pö -sü 'ka 'ö -de -zuö' 'gü -ne 'ö 'kpaakpa. -Yö -së -zian' kɔ -yö 'ö -de kë -ne me 'ö 'yaa 'kpaakpa -a 'dhö 'kpongtaame -nu wö 'dhiö kɔ 'kpaakpadhe 'ö go -Zlan 'piö bhë -yaan kë -a -gɔ. ¹⁹Bhii 'kpaakpadhe 'ö 'kpongtaa zö bhë -yö 'blɔɔn- -pë 'ka -Zlan wö 'dhiö. -A -wun 'gü pë 'ö -beɛn' -sü 'ka -Zlan -bha 'sëédhe 'gü -ya -pö: -Zlan

-yö 'kpaakpame -nu -kun 'sɔ 'gü wo -de -gɔ 'kplaakpladhe -ta. 20'Ö- pö 'zü: Kwa Dème -ya -dɔa' -ne 'kpaakpame -nu -bha -zotadhe -yö -a -bha -pè gbe 'yaa 'dhö. 21-A -wun 'gü, kö -kun 'ö me gbe -yö 'ö -bha -kè 'gougɔ -sü -gen -gban me 'bhee- 'gü; bhii pè 'saadhö -yö -dɔ ka -bha 'ka. 22-Yö Polö 'piö oo, -yö Apolɔsö 'piö oo, -yö Píe 'piö oo, -yö 'kpongtaadhe, -kèdhösi, -dɛɛ -pè waa- -dhia' 'piö -pè, waa- ga -nu -an 'ple -wo ka -bha 'ka. 23'Kee ka -zè, ka Klito -bha 'ka, 'ö Klito -de 'pö 'ö -Zlan -bha 'ka.

'Wun 'ö -gban Klito -bha bɔme -nu -bha

4 1-Ya kè 'dhö kö ka =dua' -mü 'kaan- yi -ga =ne Klito -bha yuökème -nu 'ö 'wun giagia -nu 'wo -gban -Zlan -bha 'ö 'wo -bin -sü 'ka 'wo dɔ -sü 'ka yi kwɛɛ kö 'yièn- -an -wun =blɛɛ' -an 'dhö. 2Pè =ya kè 'wo- -dhe me 'ö 'wun 'dho -lo -sü 'ka -a kwɛɛ -a -gɔ 'ö tɔɔ -yö kè -zo -yö -a -bha -me 'ka. 3-Ya kè n -ma 'ka, za -dɔ me -bha -sü 'ö go ka 'piö 'iin 'ö go zadɔme -nu 'piö bhè yaa 'dho n =zuö' 'to zlöö. Kè 'ö- wo 'pö bhè yaa kè =ne za 'ö n -ma bhè ma -de =ne 'a- -kan. 4-Yö 'wun gia- 'ka 'pö =ne n =zuö' yaa za dɔ n -ma 'kɛɛ kè- wo 'dhö bhè yaa kè =ne pè 'wo- pö kö =ya kè 'dhö kö 'wun 'yaa n -ma yö -mü -a 'dhö. Kwa Dème =ne 'ö tɔɔ me 'ö- 'yan 'dhö n -ma. 5-A -wun 'gü kö -kun 'ö 'ka za 'kan -sü yi to 'dhiö 'ö 'ka za -lo me tuö; -ka kwa Dème 'dhiö 'gan kö -yö nu; 'ö tɔɔ yi bhè -a 'ka pè 'ö -bin -sü 'ka -dhetiidhe 'gü, -yö -dho -a yö -dhepuudhe 'gü, 'ö me 'bhee- -nu =zuö' 'gü -wun -nu 'wo -bin -sü 'ka, 'ö -an yö -dhegbeadhe 'gü. Yi bhè -a 'ka, me 'ö -dhö -a -bha 'tɔbhɔdhe 'ö -Zlan 'piö, -yö -dho -a yö.

6N dhegluzè -nu, 'wun -nu 'a go -na -a =blɛɛ' =dhia =ne, a- -gban yiè- Apolɔsö yi -bha 'ö 'a- =blɛɛ 'dhö kö -yaan kè ka -bha 'wun kè -kɔ =zuan' 'ka. Kè- wo 'dhö bhè 'ö tɔɔ a- 'piö kö 'wun =zuan' 'ö bhè 'ka bɔ -a -ta kö ka 'ta 'sü -kɔ -yö kè -Zlan -bha 'sèédhe =beɛn' -wo -naa 'gü. Kö -kun 'ö me gbe -bha -de -sü =va -bɔa 'ka -me -yö -kè -dhö, 'ö 'ka me 'bhaa bho yunng (-an dan 'ka- wo 'kuè -an -bha me =daan' -wo -bha bhè -a -wun 'gü). 7Kè -dewo poo bhè, ü -kè =bhlézè me -nu 'wo to -an -ta -dhè =ɛ? -Mè 'ö ü -gɔ 'ö -Zlan yaa ü gbaa =ɛ? =Dhe -kè 'dhö =ne -mè -kè 'ü ü -de sü =va pè -nu 'wo ü -gɔ -a -wun 'gü =ne pè 'wo- pö gbaɔ 'yaa -mü -a 'dhö e?

8=Ao, 'ma- ma. Pè 'ö 'ka -ya -a =wuèn', =ya kè ka -gɔ 'saadhö! 'Ka kè =bhɔzè 'saadhö! 'Ka kè -gludè -nu 'ka, 'kɛɛ kö yi -zè 'yièè- 'ka. =ɛɛ, =ao! -Gludèdhe 'ö bhè -kaa -a -de kè kö 'yièn- kpa ka -bha 'kwaan- kè kwa 'ko =bhaa. 9Bhii -yö -kè n 'gü =ne, me 'yi Yesu -bha bɔme -nu 'ka =ne -Zlan -yö yi -ya -dɔdhe -kaanta -bha. Yi =tɛi' -yö -kè =ne me -nu 'ö ga -sü -za =ya -lo -an tuö me 'kpekpɛ wö 'dhiö -an 'dhö. 'Yiè kè 'kpongtaame -nu 'ple waa- -Zlan -bha bɔme -nu 'ple -an -bha -ga -pè 'ka. 10Yi 'blɔnme 'ka Klito -wun 'gü; 'kɛɛ ka -zè, ka 'kpaakpa Klito 'gü =zian'; yi 'pö =faan' 'yaa yi -gɔ, 'kɛɛ ka -zè ka 'gü =ya kè 'gbee-; yi 'pö, -wo 'yan =ziö' -kè yi 'ka, 'kɛɛ ka -zè -wo ka =bhlè -ya. 11Dɔ 'kwa- wo =dɛɛ -yi =ne -a 'gü yi 'klo -tun bhɔ

din waa- 'yi mü -dho -an -wun 'gü; -kë -bha -sɔ 'yaa yi -gɔ; yi -ma -ne 'wo -tun -a wo; =ziö' 'ziö -ne 'yi- wo -nëdhö, 'ö tɔɔ yi -ya -dhe kpinngdhö 'yaa 'dhö. ¹²-Sëëbhodhe -ne 'yi- sü yuö kë -sü 'ka kö 'yiën- yi -bha -tosiadhe -kë -a -ta -pë yö -a 'gü. =Wa 'si bho yi -gɔ, 'dhuë- -ne 'yi- kpɔ -an -bha; =wa 'klobhodhe wɔ yi -ta, yi -bun; ¹³-wa 'wun yaa -blee' -yi 'ka, -a -daa kë -ne 'yi- wo -an -gɔ 'bha -dhe 'gü. -Wo -tun yi -ga -ne me -suu'- yaazë 'wo 'kpongtaa 'ö -an -bhlë gbe 'yaa -an -bha -an 'dhö.

¹⁴N 'ka 'sëëdhe -ne -a bɔ kö lë- -yaan 'kpɔ ka -ta, 'këe kö 'aan- ka 'paan bho -ne ma 'në -nu 'ö -an -dho -yö n -kë -an 'dhö. ¹⁵Bhii 'kö -kë -ne 'dhiö -sü ka 'ka -me -wo -vuu 'gɔɔ- do Klito 'gü, -yö kë ka 'yaan 'püë- wo -ne ka də -yö do; 'ö tɔɔ 'wun 'ö -gban ka -bha -këdhösü 'ö Yesu Klito 'gü -a -bha bhë, ma -ne 'a tɔɔ ka də 'ö 'wuntasë bhë 'ö bɔ n -ta 'ö 'ka- ma. ¹⁶-Dhe 'ö 'pö, pë 'a- -dhe ka -gɔ 'ö tɔɔ 'ka n 'sü ka -bha 'wun -zuan' 'ka ka wɔ -kɔ 'gü. ¹⁷Pë 'ö -kë 'ö n gbö -dhökësüzë Timote 'ö -klu -sü 'ka Dëme -bha bhë 'ö 'a- bɔ -na ka -dhë 'ma 'ö bhë, -yö kë 'dhö kö -yö ka -zo -büö ma 'wun 'zü -gbandhe -nu 'wo 'dhiö 'sü -na n 'ka Yesu Klito 'gü bhë -an 'ka -ne -kɔ 'a -Zlan -bha me -nu 'saadhö =daan' -na -a 'ka -dhe 'saadhö 'gü -Zlan -bha me -nu ziën bhë -a 'dhö.

¹⁸Me 'bhaa -nu 'wo ka ziën -wo wo -de 'sü -na =va -ne n 'ka 'dho nu ka 'piö 'ma. ¹⁹'Këe a nu -na 'ma -dëüwo, kö kwa Dëme =ya 'we -a -bha, -yö kë 'dhö kö -desüvame -nu 'ö 'a -an -wo ma -na bhë kö 'aan- -an dɔ; 'aan- -an -bha -kɔ -mɔ 'wuën- -sü dɔ 'pö, ²⁰'ö tɔɔ -Zlan -bha -gludëdhe -wun 'ple kun tɔɔ 'wun -blee' -wo -nu 'kpaan, -ya këpë -nu 'ka 'pö. ²¹-Eε, 'kwa- ma. =Dhe' -yö n -gɔ 'aan- 'kpɔ. Ka- 'piö kö 'a nu ka 'piö 'ma -klaaga 'ka 'iin 'a nu n -kɔ 'kpaan 'ka -dho waa- -kë 'lëälë -sü -an 'ka e? (-A -mlë 'ka- 'piö e?)

'Wun -go zian- -sü -zë -bha -da -Zlan -gɔ kɔɔ -sü

5 ¹'Wun 'a- ma -na -dhe 'saadhö 'gü -ne, -yö 'wun 'ö -sɔɔn yaa -go zian -sü -zë 'ö me -nu -de 'waa -Zlan -bha me -nu 'ka 'ö waa 'dho -a ka bhë -a 'ka ka ziën. 'Ö tɔɔ me do -yö ka ziën 'ö waa- ö də bɔɔ 'wo wo 'ko 'piö. ²'Ö 'wun -suu'- bhë, 'ka- =gaa' 'dhö 'ö 'ka ka -de sü -va. Pë 'ka dho -a kë -bezë -zian' 'ö tɔɔ 'më 'ö dhoë- wo ka 'ka 'ö -ya kë 'dhö me bhë 'ka- bho ka ziën. ³⁻⁴-Ya 'to n -ma, 'kö -kë -ne a ka 'ka -gbiin n medhe 'gü, n -zuö' -yö ka 'piö 'ma. 'Këe me 'ö pë -nu -kë 'dhö bhë, -a -wun bhë 'ma- 'kan 'saadhö kwa Dëme Yesu 'tɔ 'gü -ne -dhe 'wo- pö -a -bha giagia 'ka -ne a ka 'piö 'ma -a 'dhö; 'këe kë- wo 'dhö bhë -ya kë -ne 'ka 'dho ka 'ko -bhaa 'ö ma -de 'pö 'ma kë ka 'piö 'ma n -zuö' 'gü, 'piigbeedhe 'ö go kwa Dëme Yesu 'piö bhë -yö -dho kë kwa ziën. ⁵Kwa -wo -yö kë do kö me bhë 'kwaan- dɔ Satan kwëe kö -yaan 'klo bho -a bun 'gü, -yö kë 'dhö kö -a nii -yaan dha kwa Dëme Yesu -bha zakanyi 'ka.

⁶'Wun 'ö 'ka- kë -na ka -bha -de -sü -va -wun 'ka bhë 'yaa -së. Kë- wo bhë -a -tei' 'pö kaa- dɔ -ne -bluubhëepë 'teete -yö 'bluu- -bhla bhë -ee? ⁷-Ka

-bluubhæpë zii 'ö -sɔɔn yaa 'ka bhë -a bho ka -bha kö 'kaan- kè 'slööslö! -Ya kè 'pö ka -dho kè -nɛ 'bluu- 'yi -dëü 'ö- -bhæpë 'yaa- 'piö bhë -a 'dhö. 'Kɛɛ kè-wo 'dhö bhë, ma 'pö a- -dɔa' -nɛ ka- -mɛ -nu 'ka. Bhii 'ö tɔɔ kwa -bha Paakö 'wlaan- kè -sü zü -ya dɔ 'saadhö; yö -ga 'ö Klito -ya kè sla- bhë -a -bhoë' 'bhlanë 'ö -ziö kwa -bha -sɔɔn yaa -ta bhë -a 'ka bhë. ⁸Kö -kwa -zuögludhi kè; 'kɛɛ -kun -kè 'kwa- -kè -bluu- 'ö- -bhæpë zii 'ö -kè -sɔɔn yaa waa- 'wun -go zian- -sü -zè 'ka bhë 'ö- 'piö bhë -a 'ka. -Kwa kè -zian' -nɛ -bluu- 'ö- -bhæpë 'yaa- 'gü 'ö -kè -bluu- 'ö -de -ta, 'ö 'wun giagia 'ka bhë -a 'ka.

⁹'Sëédhe 'a- bɔ ka -dhë bhë, pë 'a -ya -a 'gü yö kun tɔɔ kö -kun 'ka 'bhadhe kun mɛ -nu 'wo -tosiadhe kè -na 'wun -go zian- -sü -zè kè -sü 'gü bhë -an 'ka a? ¹⁰N -ma -zotadhe kun tɔɔ mɛ -nu 'wo 'kpongtaa, 'wo 'wun -gɔ -bho zian- -mɛ -nu, -ya pë -dho 'ka -mɛ -nu, -kwaanmɛ -nu, waa- gbapë gbamɛ -nu -an 'ka bhë, 'ka ziö ka 'ko -nu -ta, 'ka 'san giagia 'ka ka 'ko -nu 'ka. N -ma -zotadhe yaa 'dho 'dhö. 'Ö -ya kè -nɛ -yö 'dhö -bezè kö ka -dho go 'kpongtaa. ¹¹'Kɛɛ pë 'a- 'piö 'ö tɔɔ mɛ -nu 'wo wo -de -dhe -na Klito -bha mɛ -nu 'ö 'wo 'wun -nu -gɔ -bho zian- -mɛ -nu, -ya pë -dho 'ka -mɛ -nu, gbapë gbamɛ -nu, 'si -bho mɛ -gɔ -mɛ -nu, yɔmüme -nu waa- -kwaanmɛ -nu -an 'ka bhë, 'ka 'kan -an -bha -zian! Kö -kun 'ö ka -nu 'ka pë -nu -bhö ka 'ko -bhaa -dewo poo.

¹²⁻¹³Ma -më -de 'ö mɛ -nu 'waa Klito -bha mɛ 'ka 'ö -an -bha kö 'aan- za dɔ -an -bha; -Zlan -nɛ 'ö dho -an -bha za kan. Mɛ -nu 'ö 'ka dho -dhe -ga -an kèwun -nu 'piö 'wo tɔɔ ka kpö 'gü -mɛ -nu -zian'; bhii pë 'ö -been' -sü 'ka -Zlan -bha 'sëédhe 'gü -ya -pö: -Ka mɛ 'gluyaaazè kè -yö 'go ka ziën.

**Mɛ -nu 'ö 'waa -Zlan dɔ -an -bha mɛ -nu 'wo
-Zlan -bha 'ka -an -bha za 'kan -sü**

6 ¹-Më -kè 'ö mɛ -ya kè ka ziën, 'ö- -bha 'wun -ya kè ö dheglumɛ -bha, 'ö 'yaa dhoë -Zlan -bha mɛ -nu 'piö, 'ö dhoë -zian' zakanmɛ -nu 'ö 'waa -Zlan dɔ -an 'piö e? ²-Yö kè ka 'yaan -nɛ -Zlan -bha mɛ -nu -wo -dho za dɔ 'kpongtaamɛ -nu -bha za kan. Ka 'ö 'ka dho 'kpongtaamɛ -nu -bha za 'kan bhë, -yö -kè -dhë 'sa 'ö 'wun pë 'toutou -nu bhë 'wo -kè ka ziën 'ö 'kaa -mɔ -a -bha 'ka -an 'kan -nɛɛ? ³-Yö kè ka 'yaan -nɛ kwa -dho -Zlan -bha bɔmɛ -nu -bha za kan; 'yö mɛ 'ö 'kwa bhë, -më -kè 'ö kwaa 'dho -mɔ 'wun -nu 'wo 'kpongtaa zö -an -blɛɛ' -sü -bha -ɛ? ⁴'Kɛɛ kö 'wun -nu -wa -da ka ziën 'sa, 'ö zakanmɛ -nu 'ö -an -bha pë gbe 'yaa -Zlan -bha mɛ -nu -bha 'piö bhë 'ka -an -dhɔɔ -kè! ⁵A- -blɛɛ 'dhö! 'Wun bhë -yö ka -bha lë- -wun 'ka. A- -dɔa' -nɛ mɛ 'ö 'kpaakpa 'ö -mɔ -a -bha kö -yö 'wun -nu bho dhegluzè -nu ziën -yö -mɔ -a -bha kö -yö kè ka ziën 'ma. ⁶-Ya kè -nɛ -kɔ bhë -a 'dhö, kö -yö -dhe -ma -kun zlöö kö 'wun -ya -da dhegluzè -nu ziën, kö -wo 'dho wo 'ko -nu 'ka zakanmɛ -nu 'ö 'waa -Zlan dɔ -an 'dhiö a?

⁷Ɛɛ, 'ö ka -yö bhë -a! -A -de pë -nu 'kwa 'we -na -an 'ka bhë -an -bha -da ka ziën -sü bhë -ya -zɔn -nɛ ka -kɔ -ya 'kun 'wun k? -sü 'ka. 'Ö bhii -më -kè 'ö 'wun

'toutou -nu 'wo bhë 'kaa -an 'to ka ziën 'iin ö 'kaa ka -kwaaw' ka -de -zü 'waa ka -kwaan -en? ⁸ Ö ka -zë 'ö 'wun 'yaa kpengdhö 'ka -an -kë; 'ö 'ka -kwaan -nu wo ka dhegluzë -nu -gɔ -zian' 'zü a! ⁹ Këë kë- wo 'dhö bhë, -yö kë ka 'yaan -ne pë yaakëme -nu waa 'dho -da -Zlan -bha -gludëdhe -pö 'gü. A- -blæ ka -dhë 'dhö -wa! 'Wun -gɔ -bho zian- -mɛ -nu, kwiga gbamɛ -nu, -dadhepiömɛ -nu, mɛ -nu -bha gɔɔn- -mæ' -dhe -nu, ¹⁰ gɔɔn- -nu -bha -wɔ 'kuë -sü kë -mɛ -nu, -kwaanme -nu, -ya pë -dho 'ka -mɛ -nu, yɔmümɛ -nu, 'sibhome -nu, mezëmɛ -nu 'wo bhë 'töüdhö, -a mɛ gbɛ yaa 'dho -da -Zlan -bha -gludëdhe -pö 'gü. ¹¹ Mɛ 'bhaa -nu -wo ka ziën 'ö -an wɔ -kɔ -yö -kë -nɛ -kɔ -suu' -bhë -a 'dhö kö waa Yesu -wun -dhe 'wun gia- -kun. 'Këë 'ka kë 'slööslö -sɔɔn yaa -gɔ; 'ka kë -ya -de -ta -mɛ 'ka -Zlan -bha 'ka; 'ka bɔ kwa Dëmɛ Yesu Klito 'tɔ waa- -Zuu 'ö go kwaa- -Zlan 'piö bhë -an -ta, 'ka kë kpengdhö -Zlan -bha 'ka.

'Wun 'ö -gban -zo -kë -de bun 'piö -sü -bha -Zlan -bha 'ka

¹² Mɛ =plëzë -wo ka ziën 'ö -ya kë 'wo- pö -ya kë -nɛ -wa Yesu -wun -dhe 'wun gia-, pë 'ö -dhi mɛ -dhë, -wo -mɔ -a -bha -wa kë. -Yö 'dhö, 'këë pë 'saadhö 'plɛ kë -sü 'yaa -së. A -mɔa kö 'a- pö 'dhö 'pië- wo; 'këë n 'ka 'dho n -de kë pë gbɛ -bha -nua 'ka. ¹³ 'Wun =zuan' do 'bhaa 'ö tɔɔ 'wun 'ö -gban -bhöpë -bha bhë; 'ö -ya kë ka- -pö: «-Bhöpë 'dhodhe tɔɔ kwa 'guu; kö 'gu -bha tɔɔ -bhöpë.» -Yö 'dhö, 'këë kwaa 'dho pë -bhö 'kwaan- -a ziö -gɔü; 'ö tɔɔ -bhöpë 'ö bhë pë 'ö- -wun 'dho 'gbee- 'ö -ziö -a 'ka pë 'plɛ -ta yö kun; bhii pë -plɛ 'wo bhë -Zlan -dho -an 'gü -siö' -do do 'ka. Mɛ 'bhee- bun 'ö bhë 'pö yaa -da kö -yaan kë 'wun -nu -gɔ -bho zian -sü -zë -nu -kaa' -pë 'ka. -Yö -dɔ kwa Dëmɛ -bha dɔ 'ka 'ö Dëmɛ -de 'pö 'ö bun -kɔɔnmɛ 'ka. ¹⁴ -Ya kë 'dhö bun 'ö -Zlan -yö kwa Dëmɛ -bha bho ga 'gü bhë, -yö -dho kwa -bha bho ga 'gü 'pö 'ö -këdhösü nu -a -dhë 'ö -bha 'piigbeedhe -kwaaw'.

¹⁵ -Yö kë ka 'yaan -nɛ ka bun -nu 'wo tɔɔ Klito dɔ -nu. -Ya kë 'pö kö a -dho Klito bun dɔ -nu do sü 'aan- kë -sɔɔn yaa -kaa' -pë 'ka a? ¹⁶ -Abi' 'gbæedhö! 'Ö tɔɔ gɔɔn- 'ö waa- -sɔɔnkédhe -wa wɔ wo 'ko 'piö kö -wa kë mɛ -lü do 'ka -nɛ bhë bhii pë 'ö -bɛen' -sü 'ka -Zlan -bha 'sëédhe 'gü -ya -pö: Mɛ -ple 'wo bhë -wo -dho kë mɛ -lü do 'ka. ¹⁷ -Yö -ga 'ö mɛ 'ö -ya kpa kwa Dëmɛ -bha 'ö wo -nu 'wo -kë -Zuu do 'ka.

¹⁸ -A -wun 'gü -nɛ 'ö 'ka dho -duë 'wun -yö yaan -sü kë -sü -dhë 'ö tɔɔ -sɔɔn yaa mɛ 'ö pin dho to mɛ -lü -bha -yaan ziö -a mɛ 'ö -nɛ -a -ta 'yaa 'dhö; bhii mɛ -ya -sɔɔn kë kö -ya -sɔɔn yaa kë 'ö -de bun 'ka. ¹⁹ -Yö kë ka 'yaan -nɛ ka bun 'ö tɔɔ -Zuu 'slööslö -bha 'kɔ. -Zuu bhë -nɛ 'ö -Zlan -ya nu ka -dhë 'ö -ya -sü 'ka ka 'gü; -ya kë 'dhö kö 'kaa ka -de -bha 'ka gbɔ. ²⁰ -Bhii -Zlan -ya ka 'dho -sɔɔnng' -va 'ka, kö -ka ka bun -nu kë -Zlan 'tɔ -bho -a 'ka -pë -nu 'ka.

'Wun 'ö -gban gɔɔn- waa- dhe -an -bha wo 'ko 'sü -sü -bha

7 ¹ 'Kwa yö 'wun 'ö ka- 'gü -dhɛɛ' kɔɔ n -gɔ 'sëédhe 'ka- bɔ n -dhë -a 'gü bhë -a -bha; 'wun mɛ 'ö -gban dhe 'sü -sü -bha bhë, -yö -së kö gɔɔn- 'ö

-dhö -yö 'to 'kwea 'ka. ²'Kee -sɔɔn kē -sü 'ö -ya -pen -duö bhē -a -wun 'gü, -yö -sē kö gɔɔn- 'ö -dhö, -a bɔɔ -yö kē -dhö, kö dhebo 'ö -dhö, -a -gɔɔn -yö kē -dhö. ³Dhe -gɔɔn -yö -dho pē 'ö dho -a kē ö bɔɔ -dhē -a kē; -kɔ do bhē -nɛ 'ö dhebo -de 'pö 'yö dho pē 'ö -dua' 'ka ö -gɔɔn buëndhö -a kaa -a -dhē. ⁴Dhebo yaa 'dho ö -dhi -a -dhē -wun kē ö bun 'ka, 'ö tɔɔ -yö -ya -a -gɔɔn -bha 'ka; -kɔ do bhē 'ö- 'ka 'pö gɔɔn- 'piö -zian' bhii -a bun -ya bɔɔ -bha 'ka. ⁵-A 'ke yaa kē -nɛ -mɔ 'ka- wo -a 'gü 'ö 'ka 'töng sü 'ö 'ka -bhea -a 'ka -Zlan -dhē, kö -kun 'ö 'ka -kan 'kuē- 'ö mɛ 'ö -dhö 'ö -wo -dhe gbe 'gü. -Ya kē -nɛ 'töng bhē -ya ziö, ka -bha =sɛɛ' -yö kē do 'zü -dëüwo; -yö kē 'dhö kö -kun 'ö kaa ka =zuökuënnudhe gbe yö gbɔ, 'ö Satan -yö ka -püö.

⁶-A pö 'a- wo 'dhö bhē, yaa kē -nɛ ka 'gbee- -ta 'a- wo -nɛ -kaa kē -nëdhö 'iin -a mɛ mɛ -nɛ -kaa kē -kɔ 'bhaa mɛ -nɛ -a 'gü. -Yö ka 'paanbhowo 'ka. ⁷-Yö n -zo 'piö -be kö mɛ -nu 'saadhö -wo kē -nɛ n 'dhö; 'kɛ kē- wo 'dhö bhē, -Zlan -yö gbɔɔ -kē kwa -dhē do do 'ka. Mɛ 'ö -dhö pē 'ö- -tian' -nɛ 'ö- yö.

⁸Mɛ 'wo =tun 'kwea 'ka waa- dhoo -nu 'ö 'wo =gɛandhoo -nu 'ka bhē, -yö -dho kē -sē kö -wo 'to 'dhö -nɛ n 'dhö. ⁹'Kee 'ö -ya kē -nɛ waa -mɔ wo =zuö' kuënnu -sü -bha, kö -wo wo 'kosüdhe waa- =gɔɔn -an 'ka; 'ö tɔɔ 'yaa -sē kö 'ka 'to 'kwea 'ka 'iin -gɛan 'ka 'kɛ kē kö dhe -wun 'iin gɔɔn- -ya -da ka =zuö' 'gü.

¹⁰Dhoo -nu kaa- ka -gɔɔn -nu, -ka ka 'to kē -sē 'ka -dhiodɔwo 'ö -nɛ -a -bha; n -wo 'yaa -mü. Kwa Dëmɛ -ya -pö kö -kun 'ö dhebo 'ö gwaan 'ö -kan ö -gɔɔn -bha! ¹¹'Ö -ya kē -nɛ -an -bha gwaan -ya 'kan, kö -kun 'ö -gɔɔn gbe sü gbɔ; 'yaa 'pö kö -yö 'ye ö 'zü -yö nu ö -gɔɔn 'piö. -Kɔ do bhē 'ö- 'ka -gɔɔn 'piö 'pö. Yö 'ka 'dho ö bɔɔ bho 'bliü!

¹²Mɛ 'ka to, a- -pö ka -dhē n -de =woë' -nɛ: Mɛ 'ö Yesu Klito -wun -dhe 'wun gia- -mɛ 'ka, 'ö- bɔɔ 'yaa Klito -bha mɛ 'ka 'kɛ kē kö -a bɔɔ bhē -ya 'piö kö -wo 'to wo 'ko 'piö bhē, kö -kun 'ö- bho 'bliü! ¹³-Kɔ do bhē 'ö- 'ka dhebo 'ö Yesu Klito -wun -dhe 'wun gia- -dhe 'ka 'ö- -gɔɔn 'yaa- Klito -bha mɛ 'ka bhē -a 'piö 'pö. Yaa 'dho go ö -gɔɔn 'piö 'kɛ kē kö yö -zē -ya 'piö kö 'wo 'to wo 'ko 'piö. ¹⁴Bhii -Zlan 'yan -yö gɔɔn- 'yaa Yesu Klito -wun -dhe 'wun gia- -mɛ 'ka bhē -a -bha, -a -bha -to ö bɔɔ 'piö -sü 'gü -an -bha -kē dhe waa- =gɔɔn -an 'ka -sü -wun 'gü; -kɔ do bhē 'ö- 'ka dhe 'ö 'yaa Yesu Klito -wun -dhe 'wun gia- bhē -a -bha 'ka 'pö, 'ö bhii 'yaa 'pö -be kö -an -bha 'nē -nu 'wo bhē -wo -dho kē mɛ -nu 'ö 'waa -Zlan -bha 'ka -an 'ka. 'Kɛ kē 'kwa -dhe -ga -a 'piö -sē 'ka, -Zlan -kɔ -sē -yö -an 'piö. ¹⁵'Ö -ya kē 'zü -nɛ 'pian =ple 'wo bhē -an 'piö, mɛ mɛ 'ö 'yaa Yesu Klito -wun -dhe 'wun gia- bhē -nɛ 'ö- 'piö kö 'ö 'kan ö 'bha -bha, kö -ya kē 'pö; 'kɛ Yesu Klito -wun -dhe 'wun gia- -mɛ 'ö bhē 'yaa -nëng -sü 'ka 'wun -dhe mɛ bhē -a 'gü; 'ö tɔɔ -Zlan -yö kwa =dhɔɔ -kē kö 'kwaan- kē =zuöyagluu 'gü. ¹⁶Bhii 'ö tɔɔ bhi 'ü dhebo 'ka bhē, ü -dho -a -tei' dɔ -mē -bha -nɛ ü -dho -a kē kö ü -gɔɔn -yaan dha =ɛ, 'iin bhi 'ü gɔɔn- 'ka bhē, -mē 'ü dho -a dɔ -a -bha -nɛ ü bɔɔ -dho dha =ɛɛ?

'Ta -sü -kɔ 'ö -Zlan -zo 'kun -wun 'gü

17-Ya 'kan 'wun me bhë -a -bha, me 'ö -dhö, -a wɔ -kɔ -yö kē -ne -kɔ 'ö kwa Dëme -ya -yaa' -a -zuö' -bha kö =yaa- -dhɔɔ kē -yaan kē Yesu -wun -dhe 'wun gia- -me 'ka bhë -a 'dhö. -Dhiodɔwo 'a- dɔ -na Yesu -wun -dhe 'wun gia- -me -nu -dho 'kuë- -sü -nu 'gü -dhe 'saadhö -bha 'ö bhë. 18-Me 'ö go 'bɔng kö yaa kē Yesu -wun -dhe 'wun gia- -me 'ka -kun, 'ö -ya kaa zlöö bhë kö -kun 'ö ö -de -kē =zuö' -to zlöö -me 'ka Zuifö -nu -bha wɔ -kɔ 'ö -kē -dho 'bɔng -sü 'ka bhë -a -wun 'gü. 'Iin me 'ö -Zlan -ya -dhɔɔ -kē kö yaa 'dho 'bɔng -kun bhë, kö -kun 'ö ö -de -kē -dho 'bɔng -me 'ka. 19-Bhii ü -dho 'bɔng oo, ü 'ka 'dho 'bɔng oo, -Zlan 'to 'yaa- gbe -bha. Pë me 'ö- -wun 'dhö 'gbee- 'ö tɔɔ -a -bha tɔng -nu 'kun -sü. 20-Me 'ö -dhö -yö 'to =ne -kɔ 'ö -kaa' kö -Zlan =yaa- -dhɔɔ kē bhë -a 'dhö. 21-Ya kē -ne ü -kē -nua 'ka -Zlan -yaan =tun ü =dhɔɔ kē -na, kö -kun 'ö ü =zuö' -yö to zlöö. 'Kee -ya kē -ne ü -bɔ -a -ta -pë =ya kē -dhö kē 'üen- 'go 'gan 'gü, kö -bhö -a 'kun 'gbee- kö -potaasü -yaan kē ü -gɔ! 22-Kë- wo 'dhö bhë 'ö tɔɔ me 'ö to =nua 'ka 'ö kwa Dëme -ya =dhɔɔ -kē kö -potaasü -ya -gɔ, 'go mü 'ö- -bha 'wun 'ple -yö -gban kwa Dëme -bha. -Kɔ do bhë 'ö- 'ka me 'ö -potaasü -yö -kē -a -gɔ 'ö Klito -ya -dhɔɔ -kē bhë -a -bha 'ka 'pö, bhii kö =ya kē -a -bha =nua 'ka. 23-Zlan =ya ka 'dho =sɔng' =vaazë 'ka 'saadhö (Klito fei 'ka); =kun -kē 'ka -kē me 'bhee- -gɔ =nuadhë 'gü! 24-N dhegluzë -nu, a- -pö ka -dhë: Me 'ö -dhö -yö to =ne -kɔ 'ö -kaa' kö -Zlan -yaan =tun -a -dhɔɔ kē -na bhë -a 'dhö.

'Wun 'ö -gban me -nu 'wo 'kwea 'ka -an -bha

25-'Wun me 'ö -gban me -nu 'ö 'waa gwaan 'iin 'ö waa dhe 'sü -an -bha bhë, tɔng yaa 'go kwa Dëme 'piö -a =wuën'; 'kee a -mɔa 'aan- -wun =blee' 'ö tɔɔ kwa Dëme -bha 'glusë 'gü =yaa- kē 'ma kē me 'ö me -nu -wo wo -zo tēn n -dhë -a 'ka.

26-Dhe 'ö -kē -ne 'töng 'ö 'kwa- 'gü -ne -yö 'wun 'gbee- -nu -bha 'töng 'ka bhë, n -ma -zotadhe 'ö tɔɔ =yö -së gɔɔn- -bha 'ka kö -yö ö bha 'to =ne -kɔ 'yö- 'ka bhë -a 'dhö. 27-Ya kē -ne dhe -yö ü -gɔ, kö -kun 'ü- bho ü 'piö; 'ö =ya kē 'zü -ne dhe 'yaa ü -gɔ, kö -kun 'ü ü -de -kē dhe 'sü -dho 'ka! 28-'Kee kē- wo 'dhö bhë, yaa kē -ne kö me 'ö =ya dhe 'sü 'iin 'nédhezë 'ö =ya 'dho gwaan kö =ya =sɔɔn yaa kē 'yaa -mü. -A pö 'a- wo 'dhö bhë 'ö tɔɔ 'në gɔɔn- waa- 'nédhezë 'wo wo 'ko 'sü -na dhe waa- =gɔɔn -an 'ka bhë, -an 'yēngng -dho bhɔ =va -an -bha -kē 'ko 'piö -sü bhë -a 'gü. Pë 'ö -kē 'a- 'piö kö -yö 'san ka 'ka bhë 'ö bhë.

29-A pö 'a- wo 'dhö bhë, n dhegluzë -nu, 'ö tɔɔ -tosiadhe 'ö 'kpongtaa zö bhë, -a 'dhiötöy 'yaa =gbiin gbɔ bhë. -A -wun 'gü 'go =dɛɛ -bha, me 'ö dhe 'dhö -a -gɔ, -yö kē =ne me 'ö 'yaa- -gɔ -a 'dhö, 'wun 'ö -gban -Zlan -bha -a 'gü ('ö tɔɔ =kun -kē ö -gɔ kɔɔ -wun -yö -kē -a -bha -zo -ta -a 'gü -wun do 'ka). 30-Kö me -nu 'wo 'gbo bɔ -na, -wo kē =ne me -nu 'ö 'waa 'gbo bɔ -na -an

'dhö; kö me -nu 'wo 'yee 'to -na, -wo kë -ne me -nu 'ö -kpe 'yaa -an -bha -an 'dhö; kö me -nu 'ö 'wo pë 'dho -na -wo kë -ne me 'ö pë 'wo -dho bhë 'ö 'yaa -an -go -an 'dhö; ³¹kö me -nu 'ö 'kpongtaapë -sëebö 'dhö -an -go, -wo kë -ne me -nu 'ö 'yaa -an -go -an 'dhö; bhii 'kpongtaadhe 'ö 'ka -ga -na bhë, yaa 'dhö -glöö =duö gbö.

³²A- 'piö kö 'ka ka bo -do pë -nu =zönnng' -ta -sü 'ka. 'Ö töö me 'ö dhe 'yaa -go, pë 'ö- -wun 'dho -a -bha 'ö töö kwa Dëme -bha yuö. Pë 'ö- -zo 'dhö -a -dhë 'ö töö kö 'ö 'yi -yö 'kan -a 'dhii. ³³'Këe kö me 'ö dhe 'dhö -a -go bhë -yö 'kpongtaapë -nu 'piö bhii 'ö töö -ya 'piö kö 'ö -wun 'yi -yö 'kan 'ö böö -dhë. ³⁴-A -do 'wun =ple =zönnng' -ta -gen -ga 'ö bhë; -kö do bhë 'ö- 'ka 'ö dhe 'ö 'yaa gwaan 'iin 'nëdhezë 'ö yaa 'dho gwaan 'ö 'ö -zo -kaa' kwa Dëme -bha 'wun -nu 'piö -a 'ka; bhii -ya 'piö kö 'ö kë kwa Dëme -bha 'ka 'ö =zuö' 'gü -wun -nu waa- 'ö kë -kö -nu -an 'ple 'gü. 'Këe kö dhe 'ö gwaan -yö do 'ö -de =zönnng' -ta 'kpongtaapë -nu -wun 'ka; 'ö- 'piö kö 'ö 'yi -yö 'kan 'ö =gön dhi.

³⁵A- -blëe ka -bha 'wunsë 'ka; n 'ka ka 'gbee- -ta bho; 'ö töö a- 'piö kö 'ka kë -ne -kö 'ö ka -ma kun -a 'ka -së 'ka bhë -a 'dhö, 'këe kö 'ka 'to -klu -sü 'ka 'fefedhö kwa Dëme -bha yuö kë -sü -bha.

³⁶'Kwa yö 'wun me 'ö -gban -zo -tën 'ko -dhë -me 'ö 'wo dho wo 'ko sü -be 'këe 'wo- pö zlöö wo 'ka 'dho wo 'ko sü bhë -a -bha; n -ma -zotadhe 'ö =ne: =Ya kë -ne 'në göön- -ya -dhe -ga 'wun bhë -a 'gü -së 'ka 'ö =yaa- yö =ne 'ya- kë 'dhö kö 'ya pë yaa kë 'ö 'bha 'ka 'iin 'ö =yaa- yö 'zü =ne 'ö -kö yaa -mo -to 'dhö -sü -bha, 'ö- 'piö 'zü kö 'wo wo 'ko 'sü, kö 'yaa 'wun yaa 'ka; -wo wo 'ko 'sü -ne -kö 'ö- 'ka -an -dhë -së bhë -a 'dhö. ³⁷'Iin -ya kë -ne -kö do bhë -a 'dhö 'ö- -ya 'ö -de =zuö' 'gü 'gböngböng =ne wo 'ka 'dho wo 'ko sü, 'ö =ya -dhe -ga -a 'gü 'ö dho -mo -a -bha, -a me bhë kö =yö -së. ³⁸Kö 'kwa -dhe -ga -a 'piö -së 'ka me 'ö waa- 'ö -dhöobhaadhe 'wo wo 'ko sü bhë, -ya -kë -së. 'Këe me 'ö dho zlöö 'ö waa- dhe 'ö waa wo 'ko 'sü gbö bhë, -ya -kë -së 'zü ('ö =zië' -a me -blëezë -ta).

³⁹Dhe 'ö gwaan, -a -klu -sü -mü 'ö =gön -bha 'töng 'ö =tun -a 'ka 'bhee- 'gü bhë -a 'ka; 'këe =ya kë -ne 'yaa -dhö gbö kö -potaasü -yö dhe 'ö =ya 'to =gean 'ka bhë -a -go kö -yaan gwaan 'kpo me 'waa gbe -go 'zü; 'këe kö -yö kë Klito -wun -dhe 'wun gia- -me -nu 'ka =zian'. ⁴⁰-Yö 'dhö 'këe -yö -dho kë -a -go =zuögludhi -wun 'ka kö -yö 'to 'dhö zlöö. -Wo -kaanta 'ö bhë, -yö n -de =zuö' 'gü -wun 'ka 'këe kë- wo 'dhö bhë, -Zuu 'ö go -Zlan 'piö -yö n 'gü 'püë- wo!

'Wun 'ö -gban -köpë 'wo sla- bho -a 'ka -a -bha

8 ¹'Wun me 'ö -gban -köpë 'wo sla- bhoë gbapë -nu -dhë -an -bha bhë, 'kwa yö -a -bha. -A pö 'ka- wo: 'Wundöthe -yö kwa 'saadhö kwa -go bhë, -yö 'wun gia- 'ka. 'Këe 'wundöthe 'ka- ga -na bhë -yö me -kë -desüvame 'ka; 'ö -dho -zë 'yö- -kë =zian' 'ö kwa -bha -zo -yö -Zlan -bha -sü

-yö -da 'dhiö. ²-Yö kē ka 'yaan =ne me 'ö- pö -na ö -de -dhē =ne 'wundɔdhe -yö ö -gɔ bhē kō 'wundɔdhe 'yaa- gɔ =ne -kɔ 'ö dho -a dɔa bhē -a 'dhö.

³Kē me 'ö -Zlan -dho 'dho -a -bha bhē, -Zlan -ya -me -ga =ne me 'ö- -bha 'ka -a 'dhö.

⁴Dhæ' bhē 'ö tɔɔ: -Köpē 'wo sla- bhoë bhē, -wo -mɔa 'wo- -bhö -a? 'Kē kē- wo 'dhö bhē kwa- =dɔa' =ne pē 'ö dho kē gɔapē -yö -a -bha -pē 'ka 'kpongtaa zö 'yaa 'dhö; 'ö 'kwa- dɔa 'pö =ne -Zlan -yö 'dhö do. ⁵'Kö -kē =ne me -nu -wa -pö -zlan -nu -wo -dhö =va 'kpongtaa waa- dhang- 'gü -dhe -nu -an -bha, 'wun 'ö -dee 'dhö 'wun gia- 'ka, 'ö -an dēme -nu 'dhö -dhö 'pö, ⁶kwa -bha 'kwa- dɔ 'ö tɔɔ -Zlan -yö do kwa Dē 'ka. Yö =ne 'ö pē 'saadhö 'plē -da; 'ö 'kwa -tosiadhe -kē -a -bha kē 'ka. Kwa -bha 'ka 'pö, kwa Dēme -yö do Yesu Klito 'ka. Yö =ne 'ö- -kē 'ö pē 'saadhö 'wo -kē -dhö 'ö kwa -de 'pö 'kwa -tosiadhe -kē.

⁷Kē kē- wo 'dhö bhē 'wun bhē -a -bha -kē 'wun gia- 'ka -sü bhē, me 'plē 'waa- dɔ; yö =ga me 'bhaa -nu 'wo -dhö 'ö gɔapē -bha -kē me -gɔ -sü -ya 'to -an kē -kɔ 'ka bhē 'ö -köpē 'wo sla- bho -na -a 'ka bhē 'wo- -bhö -na zlöö =ne pē 'wo- pö 'kpa -an -mɔ -a 'gü -sü -mü bhē -a 'dhö bhē. Bhii -ya kē 'dhö 'ö -an =zuö' -yö to zlöö. ⁸Yö =ga 'pö 'sa, 'ö 'yaa -bhöpē 'ö dho kwa =yɔɔn -Zlan -bha -a 'ka bhē, bhii -ya kē =ne 'kwa -a -bhö, -a -bha 'pē 'yaa kwa -bha; 'iin 'kwa- -bhö 'pö, 'kwa -pē gɔe yö -a 'gbloo 'piö.

⁹Kö -ka ka -zo kē ka 'wun kē -kɔ -nu 'piö -potaasü 'ö ka -gɔ bhē -a 'ka, -kun -kē 'ö me -nu -wo to ka 'piö 'ö 'wo -da wɔ -kɔ yaa kē -sü 'gü -an -bha -zo -yö -Zlan -bha -sü -bha -kē 'tee -sü -wun 'gü. ¹⁰Me 'ö- -bha -zo -yö -Zlan -bha -sü 'dhö 'tee, -ya -kpēn bhi 'ö 'wundɔdhe 'dhö ü -gɔ bhē ü -bha kwiga -gba -a 'gü -kɔ 'gü, -a -faan' 'ka 'dho mē kō -yö -köpē -nu 'wo sla- bho -na -a 'ka bhē -yaan -a -bhö -a? ¹¹-Ya kē 'pö, dheglu -me 'ö- -bha -zo -yö -Zlan -bha -sü 'dhö 'tee 'ö Klito -yö ga -a -wun 'gü bhē kō ü 'ka- -püö ü -bha 'wundɔdhe -kwa' =a? ¹²-Ya kē =ne dhegluzē 'ö- -bha -zo -yö -Zlan -bha -sü 'dho 'tee bhē, 'bha- kē 'dhö kō 'bha pē yaa kē -a 'ka -a =zuö' 'gü kō 'bha =ɔɔn yaa kē Klito gia- 'ka. ¹³-Ya kē 'dhö, 'kō -kē =ne n -ma pē 'ö 'wo sla- bho -a 'ka bhē -a -bhö -sü -yö n dheglu -püö -gen 'ka, kō n 'ka dho -a -bhö gbɔ.

**Pē 'ö dɔ Yesu -bha bɔme -nu -tian' 'ö Pɔlö yaa- sü
waa- pē -nu 'ö -an -dua' 'dhö -mü kō -waan kē**

9 ¹Ma 'ka n -ga -na =ne Yesu -bha bɔme -mü n 'ka; kō -potaasü -yö n -gɔ. A -kpēn kwa Dēme Yesu -bha; yuö 'a- -kē kwa Dēme -dhē bhē, ka =ne 'ka tɔɔ -a -yö -a -bha -pē. ²'Kö -kē =ne me 'bhaa -nu 'waa n 'sü =ne Yesu -bha bɔme 'dhö, ka -zē, -yö n 'gü =ne ka -dho n dɔa. -A -de ka -bha -kē Dēme 'gü -sü bhē -ya -zɔn =ne a- -bha bɔme 'ka.

³-Ka -dhe -ga 'dhe! -A 'bhaa -nu =ya kē, -kɔ 'a n -de -ta =kɔɔ' -na -a 'ka -nu wo, n =tɔkēme -nu -gɔ bhē 'ö =ne: ⁴Yuö 'a- kē -na =ne bhē pē 'ö n =dua'

'ka, -bhöpë -nu waa- müpë -nu 'ka 'yaa 'dhö a? ⁵N -dua' 'yaa -mü kö 'a dhe 'sü kwa dhegluzë -nu ziën 'a- kë n bɔɔ 'ka, 'iin kö 'a- kpa n -ma 'ta 'bhaa -nu 'gü -nɛ -kɔ 'ö Yesu -bha bɔmɛ mɛ 'wo to -a 'dhö -nɛ, kwa Dëmɛ dhegluzë -nu waa- Piɛɛ -nu 'wo- kë -na -a 'ka bhë -a 'dhö a? ⁶Iin kë- wo 'dhö bhë -nɛ yië- Baanabasö yi -de 'sloo -nɛ 'yi dho yuö kë kö 'yiën- yi -bha -tosiadhe -kë -a -ta -pë yö -a 'gü kö mɛ gbɛ -yaan 'kun -nu yi -dhë -sü 'ka a? ⁷Ka- ma do -nɛ 'dhasi -yö -dho ö -bha 'sɛ -glu gɔn -dhia ö -de -gɔ -naɔ 'ka a? 'Iin dö 'ö dho 'ö 'lü ta 'ö 'yaa- bhe -bhö -ee? 'Iin dö 'ö -tuë -to 'ö 'yaa- 'yɔn 'yi dan -ɛn?

⁸Kö -kun 'ö -kë ka -zo 'piö -nɛ mɛbheedhe 'ta 'sü -kɔ 'ö 'a- 'bhaa -nu sü 'wun =zuan' 'ka yö -mü; 'ö tɔɔ Moizö -bha tɔng -ya -blɛɛ -nɛ -kɔ bhë -a 'dhö 'pö. ⁹Tɔng 'sëédhe bhë -yö -bɛɛn' -sü 'ka -a 'gü =nɛ: Kö -kun 'ü -piö 'klang yö -du 'ö 'blee- ga zɔn -na bhë -a 'dhi -bha! Kë 'ö- wo 'dhö bhë dɔ 'pö 'ö -Zlan 'dhoë- woë- -du -nu =zɔnng' -ta bhë =ee? ¹⁰-Abi! Kwa -wun =nɛ 'ö 'wun bhë 'ö- -blɛɛ -a -wun 'gü =zian'. 'Kɛɛ -yö 'wun gia- 'ka; bhii 'ö tɔɔ mɛ 'ö -dhe -ya -na -yö -dho -a -pë kan, 'ö mɛ 'ö -bluu' -kpa -ma -na 'ö dho ö -bha ga yö 'pö. ¹¹'Wun 'ö -gban -Zlan -bha, -a ta kun 'yi- wo ka 'gü bhë -a? -Ya kë 'pö kö ka -gɔ -pë -nu 'wo bhë yi -dhë sü 'gbee- -ta 'ka a? ¹²Mɛ mɛ -nu 'ö 'wo to, kë 'ö- wo -na -an -dua' 'ka 'ö 'ka- kë -na -an -dhë bhë, kö yi 'dhe, yi 'më 'ö yi -bha 'yaa ziö -an -bha -ta bhë ɛɛ?

'Kɛɛ kö kë- wo 'dhö bhë, pë 'ö yi -dua' 'ka bhë, yië -a gbɛ -dhe; pë 'yi- -kë =zian' 'ö tɔɔ 'to 'yi- wo 'dhö -yö kë 'dhö kö 'wuntaasë 'ö -gban Klito -bha bhë, -kun -kë 'ö- kuënnupë dho kë -dhö (-yaan 'to zlöö). ¹³-Yö kë ka 'yaan -nɛ mɛ -nu 'wo yuö kë -na -Zlan -gɔ kɔɔ bhë, -bhöpë 'ö mü bhë -nɛ 'wo- nu -an -dhë, 'iin mɛ -nu 'wo sla- bho -na bhë sla- -bho -a 'ka -pë bhë -an -bha -yö -kë -dhö. ¹⁴-Kɔ do bhë -a 'ka kwa Dëmɛ -ya -blɛɛ 'ö- pö mɛ -nu 'wo 'wuntaasë -blɛɛ' -na bhë, kö -wo -tosiadhe kë -a 'gü -pë -ta.

¹⁵Kɛɛ yö =ga 'ö pë -nu bhë, 'ö n 'ka- gbɛ -dhe; 'iin yaa kë 'pö -nɛ 'sëédhe 'a- bɔ -na -nɛ, a- -bɔ kö 'kaan- -a 'gü -pë kë 'dhö yö kun; 'kö -kë -nɛ a -dho ga, kö ga 'a dho -a wo n -ma 'wuntaasë -blɛɛ' -sü 'gü, 'kɛɛ n 'ka dho pë gbɛ -dhe. N -ma -kë 'gɔugɔ -sü 'ö bhë, mɛ gbɛ 'ka dho -a bho n -ma. ¹⁶'Ö kë- wo 'dhö bhë, n -ma 'wuntaasë -blɛɛ' -sü bhë n 'ka 'dho n -de sü -va -a -wun 'gü. Pë 'ö n =dua' 'ka, 'a dho -a kë yö -mü. -A 'ke n 'ka- -blɛɛ', 'wun 'gbee- -yö -dho kë n 'ka. ¹⁷-Ya kë -be -nɛ ma gia- 'a- pö a -dho kë 'wuntaasë -blɛɛ' -mɛ 'ka, kö a -dho -ya n -saan' -wuën'. 'Kɛɛ yaa kë 'dhö gbɔ 'sa. Yö =ga 'ö -kë n =dua' 'ka bhë; kö pë 'ö n =dua' 'ka kö 'aan- kë bhë -nɛ 'a- kë -na 'kpaan 'ka bhë. ¹⁸-Ya kë 'dhö n =saan' -yö -dho kë -më 'ka ɛ? 'Ö tɔɔ -kpɛ 'ö n -ta 'ö 'a 'wuntaasë -wun -blɛɛ' -na -a 'ka 'kpaan 'ka 'ö pë 'ö n =dua' 'ka 'ö 'maa- -dhe bhë.

¹⁹Ka- -yö bhë =a, -potaasü -yö n -gɔ, bhii mɛ gbɛ -bha 'pë 'yaa n -ma. 'Kɛɛ a n -de kë mɛ 'plɛ -bha -nua 'ka, mɛ -nu -waan nu =va n 'piö 'wuntaasë 'gbloo 'piö. ²⁰-Ya kë -nɛ a yuö kë -na Zuifö -nu ziën, n wɔ -kɔ -yö -kë -nɛ

-an -bha 'dhö, 'kɛɛ kö kɛ- wo 'dhö bhë -wo mɛ -nu 'wo wo -gɔ dho sia-Moizö -bha tɔng -dhë bhë, 'ö 'maa -an -mɛ 'ka, 'kɛɛ a- -kɛ 'dhö kö -waan 'we 'wuntaɔsɛ -wun -bha -va 'ka. ²¹-Kɔ do bhë 'a- -kaa' 'pö mɛ -nu 'ö 'waa Moizö -bha tɔng dɔ bhë -an ziën; a- 'slë -mɛɛ kö 'yi yi 'ko -wo 'gü 'ma. 'Kɛɛ kɛ- wo 'dhö bhë, -naa -yö -dhö -a mɛ 'ö -gban tɔng -bha bhë -a -bha, bhii a -klu -sü 'ka Klito -bha tɔng -bha; -yö kɛ 'dhö kö -waan 'we 'wuntaɔsɛ -wun -bha. Yaa kɛ =nɛ pɛ 'wo- pö 'maa -Zlan -bha tɔng -bhlë -ya n -ma -gɔ -dho sia- Klito -bha tɔng -dhë -sü -wun 'gü bhë yö -mü. ²²Mɛ -nu 'wo 'tëëtë -zo -yö Yesu -bha -sü 'gü bhë 'ma kɛ -an ziën, a pɛ -nu -kɛ -an -bha -naa -bha kö -waan 'we 'wuntaɔsɛ -wun -bha. -Kɔ bhë =nɛ 'a n -de -kaa' -dhe 'saadhö 'gü, kö -kɔ 'wo- -bha, 'ma n -de kɛ =nɛ -an 'dhö kö -an mɛ 'bhaa -nu -waan 'we 'wuntaɔsɛ -wun -bha. ²³Wun -nu 'wo bhë a- 'plɛ -kɛ 'wuntaɔsɛ -wun 'gü, -yö kɛ 'pö kö -a 'gü -pɛ -sɛ -nu 'wo -dhö bhë n -ma -yö kɛ -dhö.

²⁴(-A =tɛi' -yö -kɛ =nɛ 'wun 'ö -gban -bla 'sü -sü -bha bhë -a 'dhö.) -Yö ka 'yaan =nɛ -blasümɛ -nu 'saadhö -an 'plɛ -wo -lo -bla -bha 'töüdhö wo 'kuë; 'kɛɛ =ya kɛ 'dhö 'ö mɛ do -yö -kɛ -an -gɔtaame 'ka 'ö 'wo- 'kian nu. Kö -bla bhë -a 'sü -kɔ 'ka dho -a süë kö -waan ka -bha -to -a 'gbee- 'ka -sü 'kian nuë bhë -a kaa. ²⁵Mɛ -nu 'wo bhɔmɛ -nu 'ka bhë =wa 'dho bhɔ -sü 'ö 'dhö -a =daan' =dhia, mɛ 'ö -dhö -yö -dhio -dɔ ö -de -ta 'ö ö -de 'gbee- -ta bho -yö kɛ 'dhö kö -yö -to -a 'gbee- 'ka 'gɔ =gblaa' yö; 'kɛɛ kö pɛ 'ö 'dhö bhë 'sa 'gɔ =gblaa' 'ö bhë =glɔɔpɛ 'yaa -mü. Kwa -zë, kwa kwa -bha -kɛ, -yö kɛ 'dhö kö 'gɔ =gblaa' 'ö =glɔɔsü bhë -yaan kɛ kwa -gɔ. ²⁶-A -wun 'gü, ma -bla 'sü -sü 'gü, n 'yan -yö 'wun -gɔ 'dhodhɛ -bha. N kɛ -kɔ -yö -kɛ =nɛ -kɔ kpö -zuö -mɛ 'ö 'yaa -kɔ kpö -zuö piöng 'piö 'kpaan -a 'dhö. ²⁷Kɛ- wo 'dhö bhë, a n -de bun 'gbee- -ta -bho, 'ö 'a n =zuö' -we -a -bha -wun -nu -kɛ; -yö kɛ 'dhö kö ma 'ö 'a 'wuntaɔsɛ =blɛɛ mɛ -nu -dhë bhë, -kun 'a dho kɛ bo -mɛ 'ka -an ziën.

'Wun 'ö -gban gbpä -nu -bha -kɛ ya -sü -bha

10 ¹N dhegluzë -nu, a- 'piö kö kwa 'bhema -nu 'ö waa- Moizö -nu 'wo 'ta sü wo 'kuë 'kpa bhë, pɛ 'ö -kɛ -an 'ka bhë, 'a ka -zo -yö -büö -a 'ka. =Dhe 'wo- -bha 'töüdhö, 'dhuu kpö -yö -an -ta -kpa, 'ö -an 'plɛ -wo 'yoo nuɛazë -kan. ²-An -bha -kpa Moizö -bha -sü 'gü, 'ö 'wo 'yoo -kan bhë -yö -më yiö -sü 'ka 'ö 'wo- wo 'dhuu kpö waa- 'yoo -an 'gü -nɛ -wo -mɔ -a 'gü do =nɛ Moizö =nɛ 'wo dho to -a 'piö. ³⁻⁴-Bhöpë 'ö -Zlan -ya bɔ -an -dhë bhë wo 'plɛ -wa -bhö, 'ö 'yi 'ö- nu -an -dhë bhë 'ö wo 'plɛ 'wo- mü. 'Yi bhë -yö -go -guö gbɔng 'gü. -Guö gbɔng 'ö 'dhö bhë 'ö tɔɔ Klito 'ö -kɛ -an 'piö. ⁵-Wo -kaa' 'dhö 'kɛɛ -an 'plɛ -wun 'yi yaa 'kan -Zlan 'dhi. Pɛ -de 'ö -kɛ 'ö -an -dhe =va -dhe -wo ga 'yënnɛ =taa 'ö bhë.

⁶Ka- -yö bhë =a! 'Wun -nu 'wo 'dhö bhë, -wo -kɛ 'dhö kwa -bha 'wun =zuan' -nu 'ka, -yö kɛ 'pö =kun -kɛ kwa -dho 'wun yaa -nu kuënnu kwa =zuö' 'piö 'kwaan- kaa =nɛ -an 'dhö. ⁷Kö =kun 'ka ka -de nu gbpä -nu gba

-sü -dhë -ne -ko 'ö -an me 'bhaa -nu -wa -kaa' -an ziën bhë -a 'dhö; yö -ga 'ö- -wun 'gü 'ö pë 'ö -been' -sü 'ka -Zlan -bha 'sëédhe 'gü 'ö- pö: 'Següme -nu -wo -yaannu, 'wo pë -bhö 'ö 'wo müpë -nu mü. -Dhe 'wo yën, 'wo -luu 'wo -ya 'tan kë -sü -bha. ⁸Kwa 'ka 'dho kwa -de nu me -gɔ -bho zian- -pë kë -sü 'ö dhe waa- gɔɔn- -an -bha -sɔɔn kë -sü 'ka bhë -a -dhë -ne -ko 'ö -an me 'bhaa -nu -wa -kaa' bhë -a 'dhö. Yö -ga 'ö -an me -lü -vuu 'gɔɔ- -plë ö ga -yaaga 'wo ga -dhekpaɔyi do 'ka bhë. ⁹Kwa 'ka 'dho kwa Dëme 'gü dan -ne -ko 'ö -an me 'bhaa -nu -wa -kaa' 'ö 'wo ga -mɛɛ -bha -an 'kun 'ö- wo bhë -a -kwa' bhë -a 'dhö. ¹⁰Kun -kë 'ka -Zlan -wun yaa -blɛɛ -ne -ko 'ö -an me 'bhaa -nu -wa -kaa' 'ö -Zlan -bha bɔmɛ -yö -an 'gü -siö -a 'ka bhë -a 'dhö.

¹¹'Wun -nu 'wo bhë -wo -kë -an 'ka 'dhö 'ö -ya -Zlan -bha 'sëédhe 'gü 'dhö kö -yaan kë kwa -bha 'wun -zuan' 'ka. Bhii 'kpongtaadhe 'dhiötöyi -ya yö -klöö'. ¹²-A -wun 'gü, me 'ö dɔ -sü 'ka 'ö -gen -ta, -yö 'ö -zo kë 'ö -de 'piö kö -kun 'ö dho -piü. ¹³'Güdandhe -nu 'ka bɔ -an 'gü bhë -an 'plɛ -wo me 'bhee- -tian'; 'ö tɔɔ -Zlan 'ö -to -wo -ta -me 'ka 'ö -bha pë -nu 'ö -an 'tɔ go bhë -a -ta bhë, yaa 'dho 'ö -kwa' 'güdandhe 'ö -ziö kwa -faan' -ta -a -zü kö -yö nu kwa -ta. Yi 'ö 'güdandhe dho nu -a 'ka bhë, -yö -dho -faan' nu kwa -dhë kö 'kwaan- -a bun, 'kwaan- to -a -ta 'gbee- 'ka.

¹⁴-A -wun 'gü, n 'bhamɛ -nu, -ka ka -zo kë ka -de 'piö 'wun 'ö -gban gbapë -nu -bha -an 'gü; -ka 'kan -a -bha! ¹⁵-Yö n 'gü -ne ka -zuö' -yö -bɔ 'wun 'gü, 'ö 'ka dho -mɔ -a -bha kö 'wun -nu 'wo bhë 'ka -dhe -ga -a 'piö 'dengdhö, 'ka -yö 'ko 'dhiö kë. ¹⁶'Dhuë- -drɔɔn -kɔɔ 'ö -ya kë 'kwa -Zlan zuö pö -na -a -wun 'gü bhë ka gia- -kaa -ga bhë 'dhe! -Ya kë -ne kwa- mü -na, pë 'kwa- pö 'ö tɔɔ 'kwa -kë do Klito fei 'ö -lo kwa -wun 'gü bhë -a 'gü, 'iin -bluu' -kwa- -glu -na kwa 'kuë 'kwa- -bhö -na bhë 'ö tɔɔ kwa -dho 'kuë- -sü -mü do Klito bun 'gü. ¹⁷'Kö -kë -ne kwa -plëézë, -bluu' -bhë -yö do; kwa -dho kwa 'kou bun do 'gü bhii kwa -dho kwa 'kuë- 'ö -bluu' -bhe do bhë 'kwa- -bhö.

¹⁸Ka gia-, -ka Izlaelö 'në -nu -ga bhë! Pë -ya kë 'wo sla- bhoë bhë, me 'wo- -bhö -na bhë, -an -dho 'kuë- -sü -mü do -Zlan -bha 'ka. ¹⁹'Kö -kun 'ö -kë ka -zuö' 'piö -ne pë 'a- pö bhë 'ö tɔɔ kö gbapë -nu 'iin pë -nu 'ö me -nu 'waa -Zlan -bha 'ka, 'wo sla- bho -na -a 'ka bhë kö -an -bhlë -yö -dhö. ²⁰'Yaa -mü. Pë 'a- pö -zian' 'ö tɔɔ pë 'ö me -nu 'waa -Zlan dɔ, 'wo sla- bho -na 'ka bhë, -zuu yaa -nu -ne 'wo- -kë -an -dhë, waa- kë -Zlan -dhë; 'kɛɛ kö 'maa- 'piö 'sa kö 'ka kë 'kou do -zuu yaa -nu gba -sü 'gü. ²¹Yaa 'dhö kë -së kö 'ka kwa Dëme -bha -drɔɔn mü kö 'ka 'go mü 'ka 'dho -zuu yaa -nu -bha mü -dhia 'pö; 'iin 'yaa -së kö kaa- kwa Dëme -nu 'ka pë -bhö ka 'kuë- kö 'ka 'go mü, kaa- -zuu yaa -nu 'ka -ya -bhöpë do -taa 'zü. ²²'Kö -kun 'ka kwa Dëme -woo' -mɛɛ 'ö -da -druɛi 'gü. -A -ga 'ka- wo bhë ka 'gü -yö 'gbee- 'ö -ziö -a 'ka -a -ta -a?

'Wun 'ö -gban -Zlan 'tɔ bhɔ -sü 'ö 'wun 'saadhö 'gü

²³-Ya kë -wa -pö: «Kwa -mɔ pë 'saadhö 'plɛ kë -sü -bha.» -Yö 'dhö 'pië- wo 'kɛɛ pë 'plɛ kë -sü 'yaa -së. Kwa -mɔ -a -bha 'kwa pë 'saadhö 'plɛ -kë

'kɛɛ -a 'plɛ kɛ -sü 'yaa -sɛ kwa -bha -zo -yö -Zlan -bha -sü 'gbloo 'piö.
 24-Kun -kɛ 'ö mɛ gbɛ -yö ö -de -truɛn -mɛɛ; 'kɛɛ -yö kɛ mɛ gbɛ -bha 'ka, -ya -mɛɛ'-.

25-Potaasü -yö ka -gɔ kö -köpɛ -nu 'wo- 'dhɔɔ dɔ -na 'dhɔɔkuɛdhö bhɛ 'ka- 'dhɔ 'ka- -bhö; -kun -kɛ 'ka- 'godhɛ -nu, -a zɛ -kɔ -nu, -an gbɛ -mɛɛ ka -zuö' 'gü, kö 'kaan- -tun -a -bhö -na. 26-Bhii pɛ 'ö -bɛɛn' -sü 'ka -Zlan -bha 'sɛɛdhɛ 'gü -ya -pö: 'Kpongtaadhɛ waa- ö -ta -pɛ 'plɛ -wo kwa Dɛmɛ -bha 'ka.

27-Ya kɛ -nɛ mɛ 'ö 'yaa Klito -wun -dhɛ 'wun gia- -ya ka -dhɛ -bhöpɛ 'ka, 'ö 'ka 'wɛ -a -bha, pɛ 'saadhö 'ö- nu ka -dhɛ -bhöpɛ 'ka, -kaa -bhö; kö -kun 'ka -dhɛ' gbɛ kpɔ ka -zuö' -to zlöö -wun 'ka. 28-'Kɛɛ -ya kɛ -nɛ -yaa-pö ka -dhɛ: «Wü 'ö -nɛ -yö pɛ 'wo sla- bho -a 'ka -a 'ka», kö -a mɛ bhɛ kö -kun 'ka- -bhö mɛ 'ö 'wun =blɛɛ bhɛ -a -wun 'gü, kö -kun 'ö- -zuö' dho to zlöö. 29-N 'kaa- pö ka -bha -zuö' -to zlöö -wun -bha, 'kɛɛ mɛ 'ö bhɛ -a -bha. -Dhɛkpɔdhɛ -dho kɛ -mü -nɛ: -Mɛ -kɛ 'ö n -ma -po -taa' -wun 'ö 'a dho -a kɛ 'ö sü mɛ gbɛ -bha -zuö' -to zlöö -wun -bha -ɛɛ? 30-'Ö -ya kɛ 'zü -nɛ pɛ 'a dho -a -bhö, 'ma -Zlan zuö pö -a -ta, mɛ 'kpaan gbɛ -dho dɔ -dhɛ kö -yaan n -wun yaa -blɛɛ' -a -wun 'gü ii?

31-Pɛ dho kɛ 'ö tɔɔ ka pɛ -bhö oo, ka müpɛ -mü oo, pɛ 'oo pɛ 'ka dho -a kɛ, -a 'plɛ -yö kɛ -Zlan 'tɔ -bhɔ -a 'gü -pɛ 'ka. 32-Kun -kɛ ka -bha -tosiadhɛ kɛ -kɔ -yö -kɛ mɛ 'wo Zuifö 'ka, -a mɛ -nu 'waa Zuifö 'ka waa- mɛ 'wo Yesu -wun -dhɛ 'wun gia- -mɛ 'ka 'wo bhɛ 'ö -kɛ -an -gɔ -nɛ 'lü -kpɛü 'ö -ziö -an -gɔ zian- -a 'dhö 'ö 'wo -kpɛn -a -bha. 33-Kaa kɛ -nɛ n 'dhö bhii a n -de 'gbɛɛ- -ta -bho kö n kɛpɛ -yö kɛ mɛ -nu 'saadhö -an -dhɛ -sɛ. 'Maa n -de -bha pɛ -mɛɛ'-; 'kɛɛ mɛ 'plɛ -bha pɛ, -yö kɛ 'dhö kö -an 'plɛ -wo dha.

11 1-Ka ziö n 'wun kɛ -kɔ 'piö -nɛ -kɔ ma -de gia- 'a- 'ka Klito 'piö bhɛ -a 'dhö.

Wɔ -kɔ -sɛ 'ö mɛ -nu -nu dhoɛ- wo -bhɔ 'kuɛ- kɛdhɛ -nu 'gü

2-N =zuögludhi -sü -mü 'ö tɔɔ ka -zlö 'yaa trö n 'ka 'wun 'saadhö waa- 'ta -sü -Zlan -bha zian -ta -kɔ 'a ka -daan -a 'ka 'ö 'ka- wo -na bhɛ -a -wun 'gü giagiawo. 3-'Kɛɛ kɛ- wo 'dhö bhɛ 'wun do 'bhaa -yö -dhö 'ö 'a- 'piö kö -yö kɛ ka 'yaan; 'ö tɔɔ: Klito -yö gɔɔn- 'ö -dhö -a -kɔɔnɛ 'ka; gɔɔn- 'ö -dhö, 'ö ö bɔɔ -kɔɔnɛ 'ka; 'ö -Zlan -yö -kɛ Klito -kɔɔnɛ 'ka. 4-Ya kɛ -nɛ -bhɔ 'kuɛ- kɛ -sü 'gü, gɔɔn- -ya -kpɛla 'to ö tuö -ya -Zlan 'dhi -wo pö -a 'ka 'iin -ya -bhɛa' -a 'ka, kö -ya Klito -bhlɛ -siö. 5-Kɔ do bhɛ -nɛ dhebɔ -gɔ -ta 'yaa -kpa -sü 'ka, kö -a -gɔ -yö 'to 'pö -yö -Zlan 'dhi -wo pö 'iin kö yö -bhɛa' -a 'ka -Zlan -bha -bhɔkuɛkɔ 'gü, kö -ya ö -gɔn -bhlɛ -siö. Bhii kö -ya kɛ -nɛ dhebɔ 'wo- -gɔ bho -a 'dhö. 6-'Ö dhebɔ mɛ 'ö 'yaa- 'piö kö -yö ö -gɔ -ta -kpa, kö -yö -sɛ kö -wa -bha wun bho. 'Kɛɛ kö kɛ- wo 'dhö 'pö bhɛ 'sa, lɛ- -wun -mü dhebɔ -bha 'ka kö -wa -bha wun bho 'iin kö -a -gɔ -yö -lo. Kö -dhɛ 'ö 'pö, -yö ö -gɔ -ta -kpa. 7-A pö 'a- wo 'dhö bhɛ 'ö tɔɔ gɔɔn- -nɛ 'ö -Zlan 'bin 'ka; yö -nɛ 'ö- -bha 'tɔbhɔdhɛ 'bhü 'dhö -a 'gü. 'Yö dhebɔ -zɛ, 'yö gɔɔn- -bha

'təbħɔdhe -yö -kê -a 'gü. ⁸Ö tɔɔ dhebo =ne 'ö go gɔɔn- 'gü; gɔɔn- kun 'ö go dhebo 'gü. ⁹Yö do bhê 'zü, gɔɔn- yaa -da dhebo -dhê; dhebo -zê =ne 'ö -da gɔɔn- -dhê. ¹⁰-A -wun 'gü =ne 'ö -Zlan -bha bɔmɛ -nu wö 'dhiö, 'ö dhebo dho ö -gɔ -ta kpa kö -yaan -zɔn =ne -yö ö -gɔ -dho sia- ö =gɔn -dhê. ¹¹'Kɛɛ kē- wo 'dhö bhê, =ya kē kwa Dɛmɛ Yesu Klito -bha zian -ta dhebo 'yaa 'dhö kö gɔɔn- 'yaa 'dhö -de -ta 'iin gɔɔn- -de 'pö 'yaa 'dhö kö dhebo 'yaa 'dhö -de -ta. ¹²Ö tɔɔ -kɔ do 'ö -Zlan -yö dhebo sü -a 'ka gɔɔn- 'gü 'ö- -kaa' bhê, 'yö dhebo -de 'pö 'ö gɔɔn- kpɔ -a 'ka. Ka- -yö bhê =a! 'Wun bhê -a 'ple -go -Zlan 'gü.

¹³Ka gia-, ka -dhe -ga 'wun bhê -a 'gü -sê 'ka 'dhe! -A -ga 'ka- wo bhê, =yö -sê kö dhebo -yö ö -gɔ 'to 'kpaan -bhɔ 'kuê- -nu 'gü kö -yö =bhea' -a? ¹⁴'Kö -kê =ne -dewo poo 'kpongtaa wɔ 'gü, -yö lè- -wun 'ka kö gɔɔn- -bha wun -yö 'to =gbiin, ¹⁵'kɛɛ kö -yö dhebo -zê -bha =bhlê -wun 'ka; 'ö tɔɔ -Zlan -yö dhebo -bha wun -kê =gbiin 'ka 'dhö kö -yaan kē -a -gɔ -ta kpa -pê 'ka. ¹⁶=ɛɛ, kö 'wun bhê -a -bho 'piö -mɛ =ya kē -dhö, kö -ya bho 'piö; 'kɛɛ pē 'a mɛ -nu =daan' -na -a 'ka 'ö bhê; 'ö- 'ka 'dhö 'pö -Zlan -bha mɛ -nu mɛ 'wo -ya -sü 'ka -de -ta bhê -an ziën.

'Wun 'ö -gban -kɔ -da 'ko 'piö -bhöpê waa- -a mɛ 'ö -gban kwa Dɛmɛ -bha -bhöpê 'slööslö -an -bha

(Matiö 26.26-29; Maakö 14.22-25; Lukö 22.15-20)

¹⁷'Wun mɛ 'a yö -a -bha zlöö =ne, ka zuö pö -dhe gbe 'yaa- -bha, bhii 'ö tɔɔ ka -bha -dho 'ko =bhaa -sü bhê, 'yaa ka 'dho 'dhiö; ka 'to =ne 'ö- wo zlöö =zian'. ¹⁸-Blɛɛzê 'ka, =waa- pö n -dhê 'saadhö =ne 'ka 'dho ka 'ko =bhaa, 'gügludhe -yö -da ka ziën. -A mɛ 'kö bhê a- =tei' -dɔ =ne -yö -mɔ -a -bha -yö kē 'dhö. ¹⁹'Ma -dhe -ga -a 'gü -sê 'ka, 'gügludhe -yö -da ka ziën -yö kē 'dhö kö mɛ -nu 'ö -an kē -kɔ -nu 'dhö -sê giagiawo bhê kö 'kwaan- -an dɔ. ²⁰-Ya kē =ne 'ka bhɔ ka 'ko =bhaa kö 'kaan- pē -bhö, pē 'ka- kē -na bhê, 'yaa kwa Dɛmɛ -bha -bhöpê 'sü -sü 'ka; ²¹Ö tɔɔ -bhöpê -ya bhɔ, mɛ 'ö -dhö 'siö 'ö kpa -a -ta ö -de -kpaḡē -bhö -wun 'gü. =Ya kē 'dhö zlöö kö mɛ -nu 'ö pē 'yaa -an -gɔ bhê kö =wa 'to din 'ka, 'kɛɛ kö mɛ -nu 'wo 'dhiö bhê -wo -bhöpê -nu -bhö -na -ziögɔüsüzê 'ka. ²²-Yö -dho kē 'dhö -bezê kö mɛ 'ö -dhö -yö -dho to ö -de -gɔ kɔɔ -yaan pē -bhö, -yaan müḡē mü. Kē- wo bhê -Zlan -bha mɛ -nu -san 'pö ka -bha bhê =ee 'iin ka- kē kö lè- -yaan 'kpɔ mɛ -nu 'ö pē gbe 'yaa -an -gɔ bhê -an -ta -ee? -Mê 'pö 'ka- 'piö kö 'a- pö bhê =ɛ? -Yö -kê ka -zo 'piö -be =ne a -dho ka zuö pö =a! -Abi', n 'ka 'dho ka zuö gbe pö.

²³Bhii 'ö tɔɔ kwa Dɛmɛ -yö mɛ =daan' -wo dɔ n kwɛɛ kö 'aan- ka =daan' -a 'ka =nɛɛ: Gbeng -yi 'wo kwa Dɛmɛ Yesu kun -a 'ka bhê, -yö =bluu' -sü; ²⁴ö =dhe 'ö =ya -Zlan zuö pö -a -ta, 'ö- 'klu -kan 'ö- pö: «Pē =ne 'ö tɔɔ n bun; -yö ka -bha 'ka. -Kaa kē =ne -kɔ bhê -a 'dhö, -zo -büö n 'ka -pē 'ka.» ²⁵-Kɔ do bhê 'ö -drɔɔn -kɔɔ do -sü -a 'ka kö =wa yën pē -bhö -sü -bha, 'ö- pö: «-Drɔɔn -kɔɔ 'ö =ne 'ö tɔɔ n fei 'ö -Zlan -bha dhidhe -wun -dëü 'ka ka -nu ka

ziën. -Ya kë -ne ka- mü -na, ka -zo -büö n -wun 'ka!» ²⁶Ö tɔɔ kö -yö 'dho -yö yöë kwa Dème -bha nu -yi -bha, ka -bluu' -bhö -na, 'iin ka -drɔɔn mü -na -ne -kɔ bhë -a 'dhö, -a -bha ga -sü bhë, kö ka -a -wun -blɛɛ' -na.

²⁷-A -wun 'gü, mɛ -ya kwa Dème -bha -bluu' -waa- -a -bha -drɔɔn bhë -yaa- 'sü -kɔ 'bhaa 'gü, kö -ya -sɔɔn yaa -wun -za -lo ö -de tuö kwa Dème bun waa- -a fei buëndhö. ²⁸Kö mɛ 'ö -dhö 'ö dho -bluu' -waa- -drɔɔn bhë -an sü, -yö ö -de -ga -së 'ka! ²⁹Bhi mɛ -ya -bluu' -waa- -drɔɔn bhë -a 'sü 'kɛɛ kö -a -zɔn kwa Dème bun 'ka -sü 'ö bhë yaa -bhlë -ya, kö -ya za -lo ö -de tuö. ³⁰-A -wun 'gü -ne 'ö ka ziën 'ö 'yua -ya mɛ -plëézë -nu kë 'tëëtë, 'ö mɛ 'bhaa -nu -wa ga bhë. ³¹'Kɛɛ kë- wo bhë, kwa kwa -de 'piö -ga -bezë, kwa -dho dha -Zlan -bha za -bha -lo kwa tuö -sü -ga. ³²'Kɛɛ kë- wo 'dhö bhë kwa Dème 'yan -yö kwa kë -kɔ -nu -bha 'ö -ya kë 'ö kwa 'klo bho -yö kë 'dhö kö -kun 'ö kwaa- 'kpongtaame -nu 'ö za dho -lo kwa tuö.

³³-Dhɛ 'ö 'pö, n dhegluzë -nu, a -pö ka -dhë: -Ya kë -ne 'ka nu ka 'ko -bhaa kö 'kaan- kwa Dème -bha -bhöpë 'sü, -ka dɔ ka 'ko -nu -ga. ³⁴Ö -ya kë -ne din -ya kë mɛ 'bhaa -bha, kö -yö pë -bhö ö -ga kɔɔ; -yö kë 'dhö -kun -kë 'ö ka -bha -nu 'ko -bhaa -sü 'gü, 'ka dho -Zlan wö -siö ka buëndhö. 'Wun mɛ -nu 'wo to bhë, 'ma nu ka 'piö 'ma, kwa -dho -a yö 'ko 'dhiö.

'Wun 'ö -gban -Zuu 'slööslö -bha gbaɔ -nu -bha

12 ¹-Kwa -sië' - 'wun 'ö -gban -Zuu 'slööslö -bha gbaɔ -nu bhë -an 'piö 'sabla. N dhegluzë -nu, a - 'piö kö 'wun 'ö -gban 'wun bhë -a -bha -yö kë ka 'yaan. ²Ka gia- -yö ka 'yaan -ne -dhɛ 'ö -tun -be kö ka -tun mɛ 'ö waa Yesu -wun -dhɛ 'wun gia- -an 'ka bhë, -zuu yaa -nu -wo kë ka 'gbee- -ta bho -dhia 'ö gbaɔ -nu 'ö 'waa 'we bhë 'ka -an -gba; 'kɛɛ kë- wo 'dhö bhë, -a 'slë gbe yaa kë ka -ga. ³-A -wun 'gü, a - 'piö kö -yö kë ka 'yaan -ne: -A mɛ gbe 'yaa -dhö kö -Zuu 'ö go -Zlan 'piö bhë -yö 'dhiö 'sü -a 'ka, 'go mü kö -ya pö: «'Dhangga -yö 'kpɔ Yesu 'ka!» 'iin mɛ gbe 'yaa -dhö kö -ya pö Yesu tɔɔ ö Dème, kö -Zuu 'slööslö 'yaa- 'gü.

⁴Gbaɔ -nu 'wo bhë -an -gwaa -yö -plëézë. 'Kɛɛ kë- wo 'dhö bhë -Zuu 'slööslö do bhë -ne 'ö -an 'plɛ -wo go -a kwɛɛ. ⁵Yuö kë -kɔ -plëézë -yö -dhö, 'kɛɛ kwa Dème do -ne 'wo- -kë -a -dhë. ⁶Yuö -kë -Zlan -dhë -sü bhë, -a kë -kɔ -gwaa -yö -va. 'Kɛɛ mɛ 'ö -an kë -faan' -da mɛ 'plɛ 'gü bhë, -yö 'dhö do -Zlan 'ka. ⁷-Zuu 'slööslö -yö mɛ 'ö -dhö -a -bha yuö 'ö dho kë mɛ 'plɛ -bha 'wunsë 'ka bhë -a -nu -a -dhë. ⁸Ö tɔɔ -Zuu -yö mɛ 'bhaa -bha -kë 'kpaakpadhɛ 'ka 'ö- gbaɔ -a -ga, 'ö mɛ 'bhaa -bha -yö -kë 'wundɔdhe 'ka 'kɛɛ kö -Zuu ö bhë -yö 'dhö do 'sa. ⁹-Zuu do gia- bhë 'zü -ne 'ö mɛ gbaa -zo -yö -Zlan -bha -sü ('ö -ya kë mɛ -ga 'wo 'wun -nu kë -na -a 'ka bhë -a) 'ka; 'go mü 'zü 'ö mɛ gbaa -kɔ -mɔ 'wuën- -sü 'ka kö -yaan 'yua -nu bho -a 'ka mɛ -nu -bha. ¹⁰-Zuu -yö mɛ 'bhaa -nu gbaa -na -kɔ -mɔ 'wuën- -sü 'ka kö -waan -dhidhaapë -nu kaa kö mɛ 'bhaa -nu -bha -yö kë -na -Zlan 'dhi -wo pö -sü 'ka; kö mɛ 'bhaa -nu -bha -yö kë -na -Zuu 'ö go -Zlan 'piö waa- -zuu

yaa -an -bho 'kou kë -sü 'ka. Me 'bhaa -nu -bha -yö kë -na 'wun -nu -blæe -wo 'waa gbe 'ö 'waa- -daan' -a 'gü -sü 'ka, kö me 'bhaa -nu -bha -yö kë -na -wo gbe 'ö 'dhö bhë -a 'dhiö -lo -sü 'ka. ¹¹-Zuu do 'ö 'dhö bhë -ne 'ö pë -nu 'wo bhë 'ö -an 'plë -kë. Me 'ö -dhö gbaɔ -de -dhë -zë -ne 'yö- nu -a -dhë -ne -kɔ 'ö -dhi -a 'ka -a -dhë -a 'dhö.

¹²'Wun -nu bhë -wo 'dhö bhii -kɔ do 'ö kwa bun 'dhoë- 'ka do 'ö kwa dɔ -nu 'dhö kë -na 'ka =plëézë 'ka kwa bun -bha bhë -ne 'ö Klito -bha 'dhoë- 'ka. ¹³Kwa 'saadhö, Zuifö -nu, me 'waa Zuifö 'ka, me 'wo 'gan 'gü, me 'waa 'gan 'gü -nu, 'kwa pa -Zuu 'slööslö bhë -a 'ka kö -yaan kwa kë bun do 'ka -a -kwa', 'ö -dhe 'kwa- -bha 'töüdhö 'ö -Zuu do 'ö bhë 'kwa- yö (-ne -kɔ 'ö me 'dhö 'yi mü -na -a 'ka 'ö- 'gu 'dhö dɔ -na bhë -a 'dhö).

¹⁴Kwa bun 'ö 'ka- ga -na bhë, -a dɔ -nu 'wo- -bha -wo =plëézë; yaa kë -ne pë 'wo- pö -yö do yö -mü. ¹⁵Ya kë -ne -gen -yaa- pö -be: «-Kɔ 'dhe 'yaa -mü n 'ka, kö 'maa bun -bha.» Kö pë 'ö dho -a kan bun -bha yö 'pö bhë -ee? ¹⁶'Ö 'tonëga -yaa- pö: «'Yan kun n 'ka; -dhe 'ö 'pö, kö 'maa bun -bha.» Kö pë 'pö bhë 'ö dho -a kan bun -bha bhë -ee? ¹⁷Ya kë -ne bun -dhe 'saadhö -ya kë 'yan 'ka, kö -yö -dho 'wun ma ö -më 'ka eε? 'Iin -ya kë 'zü -ne -a -dhe 'saadhö -ya kë 'tonë 'ka, kö -yö -dho pë 'tëë ma -kɔklë -eε? ¹⁸'Ö tɔɔ dɔ me 'ö -dhö, -Zlan -ya -ya -a -yadhe -bha -ne -kɔ 'ö -dhi -a 'ka -a -dhë -a 'dhö. ¹⁹Ya kë 'zü -ne dɔ do 'ö -dhö -be, kö bun 'ka 'dho kë -dhö. ²⁰'Kee kë- wo 'dhö bhë bun -yö do 'ö- dɔ -nu 'wo =plëézë.

²¹-A me gbe yaa ziö ö 'bha -ta. -A -wun 'gü 'yan yaa -mɔ -a -bha -ya pö -ne ö -mawun 'yaa bun -bha; 'iin -gɔ yaa -mɔ -a -bha kö -ya pö -gen -nu -dhë -ne ö -mawun 'yaa -gen -bha. ²²Ya 'go mü bun -gbaan me 'ö -faan' 'yaa- -gɔ bhë, -a -bha këpë -nu -wo -dhö 'pö. ²³Dɔ -dhe me -nu 'ö -an -to plaan -sü 'yaa -së bhë -ne 'ö 'kwa kwa -zo -kë -an 'piö -së 'ka 'ö -zië' -an me -nu 'wo to -an -ta. -An me -nu 'ö -an -wun -blæe' -dhe 'yaa -dhö bhë -ne 'ö 'kwa kwa -zo -kë -an 'piö -duö. ²⁴'Kee kö -an me -nu 'ö 'waa lë- -pë 'ka bhë, 'ö 'kwaɔ sɔ -nu kë -an -bha. Kë- wo 'dhö bhë, -Zlan -yö bun -kë, kö -a dɔ -nu me 'ö -an -zo -kë -an 'piö -sü -yö -an -ma kun -duö 'kee kö -an -bhlë 'yaa -dhö bhë -yö kë -a -bha. ²⁵Ya kë -ne -kɔ bhë -a 'dhö, 'gügludhe yaa 'dho -da dɔ -nu ziën bun 'gü. Pë 'wo dho -a kë 'ö tɔɔ, dɔ 'wo dho -a wo wo 'ko -nu -wun -zɔnnɔ' -ta. ²⁶Ya kë -ne bun -gbaan do -yö bɔ -na 'wun 'gbee- 'gü, -an me 'wo to -an 'plë -wo -kpa -a -bha 'wo bɔ -a 'gü. -A me do -bhlë -ya 'kpɔ, -an me -nu 'wo to -wo -kpa -a -bha 'wo 'gludhi -kë.

²⁷'Ka 'saadhö, ka -dho 'kuë- -sü -yö Klito bun 'ka, 'ö me 'ö -dhö 'ö bun bhë 'ö -a -gbaan do 'ka. ²⁸-A -wun 'gü -ne 'ö -Zlan -bha me -nu ziën, 'ö -Zlan -yö Yesu -bha bɔme -nu -ya -blæezë 'ka; 'yö 'ö 'dhiwopöme -nu -ya =plë -naa 'ka, 'ö me -nu 'ö -an -ya -yaaga -naa 'ka, 'wo -kë me =daan' -me -nu 'ka. 'Ö -ya 'go mü zlöö, 'ö me -nu 'ö 'wo -dhidhaakëpë -nu gbaɔ yö, -a me 'wo me -nu -dhe bo gbaɔ yö, -nu me -dhë -me -nu, 'dhiö -sü me 'ka -me -nu waa- me -nu 'wo 'wun -blæe -wo gbe 'gü 'wo bhë 'töüdhö 'wo yö mü. ²⁹Me

-nu 'wo bhë -an 'plë 'waa Yesu -bha bɔmɛ -nu 'ka, 'waa -Zlan 'dhiwopöme -nu 'ka 'iin 'waa mɛ =daan' -mɛ -nu 'ka. -An 'plë waa -kɔ -mɔ 'wuën- -sü yö kö -waan -dhidhaapë -nu kɛ, ³⁰'iin kö -waan 'yuamɛ -nu -dhe bo, 'iin kö -waan 'wun -nu =blɛɛ' -wo gbe -nu 'gü, 'iin kö 'wun 'ö =blɛɛ -wo gbe 'gü bhë kö -waan -a 'dhiö -lo. ³¹Yuö -nu 'wo -gban gbaɔ -nu 'ö -Zuu 'slööslo -ya kɛ bhë -a -bha bhë, -an mɛ -nu 'ö -an -wun 'dhö 'gbee-, -ka -ya -an =wuën', 'ka -an =mɛɛ'!

Gbaɔ -nu 'wo bhë -wo -kɛ 'dhö 'kɛɛ -ka dɔ! A -dho pɛ do 'ö- -wun 'dhö 'gbee- -a -wun =blɛɛ' ka -dhë.

'Wun 'ö -gban -dho -bha

13 ¹'Kö -kɛ =nɛ -Zuu 'slööslo -yö gbaɔ -kɛ n -dhë kö 'a 'wun =blɛɛ' -mɛ 'bhee- waa- -Zlan -bha bɔmɛ -nu -an -wo 'gü, kö n 'ka -an =daan', 'ö mɛ -nu 'wo to 'ö -an -dho 'yaa n kɛ, kö ma 'wun -nu =blɛɛ' -sü -yö =nɛ =tang' -wo 'kpaan 'iin 'zü =nɛ gɔnggɔng 'wo- -ma -na, -an 'we -wo 'kpaan 'dhö. ²A -dho -mɔ -a -bha kö 'a -Zlan 'dhi -wo pö, kö 'wundɔdhe 'saadhö -yö kɛ n -gɔ, kö 'wun -nu 'wo -bin -sü 'ka, -an -gɛn ma -sü -yö kɛ n -gɔ. A -dho -mɔ -a -bha kö -zo -yö -Zlan -bha -sü 'ö =ya kɛ mɛ -gɔ 'wo -mɔ -a -bha -wa pö -tɔn -dhë -yö 'go ö pin =taa, 'ö -tɔn bhë 'ö -vin bhë, -a -zo -yö -Zlan -bha -sü =va bhë -yö kɛ n -gɔ; 'kɛɛ =ya kɛ =nɛ mɛ -nu -dho 'yaa n 'gü, kö a pɛ 'kpaan 'ka. ³'Kö -kɛ =nɛ pɛ -nu 'wo n -gɔ, a- -glu 'fɛɛmɛ -nu 'ka, 'a dho -dewo 'a n -de dɔ mɛ -nu kwɛɛ 'wo n -güö, kö mɛ -nu -dho 'yaa n 'gü, kö n -yö -a -bha -pɛ gbe 'yaa -dhö.

⁴Mɛ 'ö -dho 'dhö -a 'gü, -a =zuö' -yö -saa; -a 'glu -yö -sɛ; 'yaa -ya mɛ 'kpaan gbe -bha pɛ -dho 'ka; 'yaa ö -de -wun =blɛɛ' -'dhi =va 'gü; 'yaa ö -de 'sü =va. ⁵Mɛ 'ö -dho 'dhö -a 'gü, 'yaa lɛ- -pɛ gbe kɛ; 'yaa pɛ bɔ ö 'ka; 'yaa -naadhe kɛ, 'yaa mɛ -wun -da ö =zuö' 'piö -pɛ kɛ. ⁶Mɛ 'kpaan gbe 'yaa pɛ yaa kɛ 'yaa kɛ -a -dhë -sɛ; pɛ 'yö ö -sɛ -kɛ -a =wuën' 'ö tɔɔ 'wun 'ö kpengdhö 'ö mɛ -ya -kɛ -a 'yaan 'ka =zian'. ⁷-Dho =ya kɛ mɛ 'gü, -ya -kɛ 'ö mɛ bhë 'ö ö =zuö' kuënnu 'wun 'saadhö 'gü; -ya -kɛ 'ö -zo dɔ -sü waa -zuösaadhe -wo kɛ mɛ -gɔ 'ö =ya kɛ 'wo wo -zo yö -Zlan -bha 'wun 'saadhö 'gü.

⁸-Dho bhë -yö -dho to 'dhö =toëpö 'ka. 'Kɛɛ -Zlan 'dhi -wo pö -sü 'ö bhë -a 'töng -yö -dhö 'ö =ya kɛ 'dhö =waa- =blɛɛ' -'ö- 'töng bhë -ya ziö kö -a -yö -a -bha -pɛ gbe 'yaa 'dhö gba. 'Wun -nu -blɛɛ -wo gbe 'gü -sü bhë -yö -dho yën, 'ö 'wundɔdhe -yö yën. ⁹'Ö tɔɔ 'töng 'ö 'kwa- 'gü =nɛ, kwa -Zlan 'dhi -wo pö -na, 'kwaa- pö 'fɛfɛdhö, 'ö kwa -bha pɛ dɔ -sü 'ö bhë 'pö 'ö 'yaa -mɔ -sü 'ka 'fɛfɛdhö. ¹⁰'Kɛɛ pɛ 'ö 'fɛfɛdhö =ya nu -sia kö -a mɛ 'ö 'yaa -mɔ -sü 'ka 'kuë bhë -a ziö -sü -mü.

¹¹Ka gia-, -ka -dhe -ga bhë! =Dhe 'a =tun 'nɛ 'ka, n 'wun -nu =blɛɛ' -kɔ -nu, n -zo 'ta -kɔ -nu waa- n 'wun -nu -yö 'ko 'dhiö -kɔ -nu -wo -kɛ =nɛ 'nɛ -nu -bha 'dhö. 'Kɛɛ dɔ 'a- wo zlöö 'ö 'ma kɛ mɛ -de 'ka =nɛ, 'ma n =kwaa'

'në -bha 'wun kë -kɔ -zü. ¹²'Töng =ne -a 'gü pë -nu 'kwa -kpën -na -an -bha bhë -wo pë 'bin 'ka =ne -kɔ 'wo -dhe -ga -na -a 'ka 'sëë- 'yan 'bhluubhluzë 'gü bhë -a 'dhö. 'Këe kë- wo 'dhö bhë, -a 'töng =ya -lo =sia, (kwa -dho =dhië' -zü) 'ö kwaa- Klito -nu 'kwa dɔ kwa 'ko wö 'dhiö 'ö 'kwa- yö. Dɔ 'kwa- wo =ne 'wun -nu 'wo -gban -Zlan -bha bhë -an dɔ 'a- wo bhë 'yaa 'fefedhö. 'Këe yi bhë =ya -lo =sia, a -dho -a dɔ 'fefedhö =ne -kɔ 'ö -Zlan -yö n dɔ -a 'ka bhë -a 'dhö.

¹³'Ya kë 'dhö kö 'wun -yaaga 'ö 'wo dho to 'wo tɔɔ: -Zo -yö -Zlan -bha -sü, -zo -dɔ -Zlan -bha -sü waa- -dho. 'Këe kë- wo 'dhö, pë -yaaga 'wo bhë, -a mɛ 'ö -an -gɔ -ta 'ö- -wun 'dhö 'gbee- 'ö tɔɔ -dho.

14 ¹Kö -dho -kë mɛ 'ka -sü bhë, -ka -ya -a =wuën! 'Këe gbao -nu 'ö -Zuu 'slöösLö 'dhö -a nu -na mɛ -nu -dhë bhë, -ka -an =mɛ' 'pö; 'këe -yö -dho kë -së kö -yö kë -a mɛ 'ö -kë -Zlan 'dhi -wo pö -sü 'ka bhë -a 'ka. ²Mɛ 'ö 'wun =blɛɛ' -na -wo gbɛ 'gü bhë, yaa- =blɛɛ' -mɛ -nu -dhë, 'këe -ya -blɛɛ -Zlan -dhë, bhii mɛ gbɛ 'yaa- ma. 'Wun -nu 'wo -bin -sü 'ka -a =blɛɛ' 'ö- wo -na bhë, -Zuu 'slöösLö =ne 'ö -kë -a -bha -kɔ -mɔ 'wun -bha -sü =kwaa'. ³'Këe mɛ 'ö -Zlan 'dhi -wo pö -na bhë, -ya =blɛɛ mɛ -nu -dhë kö -yö -an =faan' 'më -an -bha -zo -yö -Zlan -bha -sü 'gü, -yaan -an =faan' 'më 'iin kö -yaan -an =zuö' =dhuë'. ⁴Mɛ 'ö 'wun =blɛɛ' -na -wo gbɛ 'gü bhë, 'ö -de 'sloo =faan' =ne 'ö- më -zo yö -sü 'gü, 'këe kö mɛ 'ö -Zlan 'dhi -wo =blɛɛ' -na bhë, -Zlan -bha mɛ -nu -todhösü =ne 'ö -an -bha -zo -yö -Zlan -bha -sü =faan' më.

⁵A- 'piö kö ka 'plɛ 'ka 'wun -nu =blɛɛ' -wo gbɛ 'gü; 'këe kë- wo bhë, -Zlan 'dhi -wo pö -sü =yö -së, 'ö tɔɔ mɛ 'ö -Zlan 'dhi -wo pö -na bhë, -yö =bhlézë 'ö =zië' 'wun =blɛɛ -wo gbɛ 'gü -mɛ -nu -ta. 'Këe kë- wo 'dhö bhë, mɛ =ya kë -an ziën 'ö =ya -mɔ -a -bha kö 'wun 'ö =blɛɛ -wo gbɛ 'gü bhë, -ya kë kö mɛ 'plɛ -wa ma, kö -ya =dhië' -kwaa -yö kë 'dhö kö -yö -an =faan' 'më -an -bha -zo -yö -Zlan -bha -sü 'gü. ⁶N dhegluzë -nu, =dheɛ' do 'ö =ne: =Ya kë =ne n -ma -nu ka 'piö -sü bhë, 'ma 'wun -nu =blɛɛ' -ka -dhë -wo gbɛ 'ö 'kaa- ma -a 'gü, 'ka -dhe -ga 'gü, -më -së 'ö dho -a kë ka -dhë -ɛɛ? -A -yö -a -bha -pë gbɛ yaa 'dhö kë -dhö ka -gɔ, -a 'ke yaa kë 'wun 'ö -kë -bin -sü 'ka 'ö -Zlan -ya -zɔn -a =blɛɛ' -wo, 'wundɔdhe =blɛɛ' -wo, -Zlan 'dhi -wo pö -sü waa- mɛ =daan' -wo -an 'ka.

⁷'Wun =zuan' do =ga =ne; -yö -sü =troo' -kë -a -bha -pë -nu, 'wo =ne -bhɔng -nu, kɔng -nu -an 'dhö bhë -a -bha. =Ya kë =ne -a mɛ 'ö -dhö -a -wobɔatadhe yaa kë -dhö, -dhe 'wo- -bha do do 'ka bhë, -wo -dho -an -wo -dho 'ko 'piö dɔ -më -bha -ɛɛ? ⁸'Ö =ya kë 'pö =ne 'truu 'ö =waa- -piö, 'ö -glugɔnme -nu 'dho -na 'kuëdhö bhë, -a -piö mɛ 'yaa- -piö -a -piö -kɔ 'ka, -glugɔnme -nu -wo dho wo -de -pë kë -kɔklë -ɛɛ? ⁹Ka gia-, -ka -dhe -ga bhë 'dhe! -Kɔ do bhë -a 'ka, 'ka -Zlan 'dhi -wo pö -wo gbɛ 'gü, -wo -dho -a -gen ma -kɔklë -ɛɛ? =Ya kë 'dhö kö pë 'ka- =blɛɛ' -na bhë -a -gɔ 'yaa -dhö, ka- =blɛɛ 'kpaan. ¹⁰-Wo =plëézë -nu -wo -dhö 'kpongtaa zö, 'këe -a mɛ 'ö dho kë -dhö kö

=waa- =blee' -waan pö -a -gen ma -me 'yaa 'dhö, 'yaa -dhö. ¹¹'Kee kë- wo 'dhö bhë, me -ya 'wun =blee'- n -dhë -wo 'ö 'maa- ma -a 'gü, kö me bhë, yi -nu 'yië kë yi 'ko -dhë -nia 'ka. ¹²Dhe 'ö -kë =ne ka -ya -sü 'ka -a =wuën' giagiawo kö -Zuu 'slööslö -bha yuö -nu -wo dɔ ka kwεε bhë, kö -wo kë ka -gɔ =va 'ka -Zlan -bha me -nu -da 'dhiö -pë 'ka, -zo -yö -a -bha -sü 'gü.

¹³Me 'ö 'wun =blee -wo gbe 'gü bhë, -a =dua' -mü kö -ya -dhe -Zlan -gɔ kö (yö gia-) -a 'dhiö -lo -sü -yö bɔ -a -ta. ¹⁴'Ö tɔɔ =ya kë =ne a =bhea' -na -wo gbe 'gü, 'kö -kë =ne n 'nii- -yö =bhea' -sü 'piö, n 'wunbhokoukédhe gbe 'yaa 'dhö. ¹⁵-Ya kë 'dhö kö pë 'a dho -a kë zlöö 'ö tɔɔ -kɔ do 'ö n nii 'dhoë- 'ka =bhea' -sü 'gü bhë, 'ö 'töng gbe 'ka 'pö 'ö n -ma 'wunbhokoukédhe dho kaa 'pö =bhea' -sü 'gü; 'iin -kɔ do 'ö n -zo 'ple dho kaa 'tan bho -sü 'gü bhë 'ö n -ma 'wunbhokoukédhe dhö kaa 'pö -a 'piö. ¹⁶Bhi gia-, =dhe 'ü- ga -a 'gü bhë, =ya kë =ne 'bha -Zlan zuö pö dosen -wo 'waa gbe 'gü, me 'kpaan -dho kë -dhö -bhokuékédhe 'gü mü kö -yö amen pö =a? 'Ö tɔɔ ü -bha -Zlan zuö pö -sü 'gü, pë -nu 'ü- =blee' bhë 'yaa- ma. ¹⁷'Kö -kë =ne ü -bha -Zlan zuö -pö -a 'gü -wun =yö 'kpédhö, yaa 'dho me gbe -bha -zo -yö -Zlan -bha -sü =faan' më.

¹⁸A -Zlan zuö -pö 'ö tɔɔ a 'wun -blee -wo gbe 'gü =va 'ka 'a =zië' ka 'saadhö ka -ta. ¹⁹'Kee kë- wo 'dhö bhë, =ya kë =ne me -nu =wa 'dho wo 'kuë-, -yö -kë n 'gü -së kö -wo kpö 'sɔɔdhu 'wo dho -a -gen ma, 'a- pö kö -an -bha -zo -yö -Zlan -bha -sü -yaan -da 'dhiö 'ö =zië' -wo kpö -vuu =plëézë -pö -wo gbe 'gü -sü -ta.

²⁰N dhegluzë -nu, kö -kun 'ö ka 'wun -nu -yö 'ko 'dhiö -kɔ -nu -wo -kë =ne 'në -nu -bha 'dhö; 'wun 'ö -gban 'wun -nu kë -sü 'gbloo 'piö -bha bhë, -ka kë me -dee -nu 'ka -an 'gü! Pë 'ö 'ka dho kë -a 'gü =ne 'në -nu 'dhö 'ö tɔɔ pë -nu 'wo -gban 'wun yaa kë -sü -bha bhë =zian' 'ö bhii 'kaa pë gbe dɔ -a -bha. ²¹Pë 'ö =bεen' -sü 'ka -Zlan -bha 'sëédhe 'gü -ya -pö: Kwa Dëme -ya -pö =nεε: A -dho 'wun =blee' -'segɔ 'ö =ne -a 'gü -me -nu -dhë; 'kee kë- wo 'dhö bhë a -dho -a -blee' -'bɔɔ' -wo gbe pö -me -nu -ta -sü 'ka. ²²-Ya kë 'dhö, gbaɔ 'ö -gban 'wun -blee -wo gbe 'gü -sü -bha bhë, -yö 'wun =zuan' 'ka me -nu 'ö 'waa -Zlan -bha 'ka bhë -an -dhë (-a -zɔn -an -dhë -sü 'ka =ne -Zlan =ya ö -ta yö -an -bha); 'kee me 'ö 'wo -Zlan -bha 'ka -an -bha 'wun 'yaa yö 'dhö; pë 'ö me -nu 'wo -Zlan -bha 'ka 'ö -an -dhë 'wun =zuan' 'ka 'ö tɔɔ gbaɔ me 'ö -kë -Zlan 'dhi -wo pö -sü 'ka (-a -zɔn -sü 'ka =ne 'ö -an ziën). 'Kee kë- wo 'dhö 'pö bhë 'yaa 'dhö me -nu 'ö 'waa -Zlan -bha 'ka bhë -an -bha 'ka.

²³Ka gia-, -ka -dhe -ga bhë 'dhe! -Ya kë =ne -Zlan -bha me -nu =wa 'dho wo 'ko =bhaa, wo 'ple =wa yö 'wun =blee' -sü -bha -wo gbe 'gü, me -nu 'waa pë gbe dɔ 'wun bhë -a -bha waa- me -nu 'ö 'waa Yesu -wun -dhe 'wun gia- -me -nu 'ka, =wa -da ka kpö 'gü mü, wo 'ka 'dhoë- pö 'blɔɔn- =ya -da -an 'gü a? ²⁴'Kee =ya kë =ne ka 'ple 'ka yö -Zlan 'dhi -wo pö -sü -bha, me -nu 'ö 'waa Yesu -wun -dhe 'wun gia- -me -nu 'ka bhë waa- 'to 'to -me 'kpaan =wa -da ka ziën, 'wun bhë -yö -dho -gban -an -bha, 'ö yö -an -bha =sɔɔn yaa

-bha, 'wun 'ö 'wo- ma -na bhë -a -wun 'gü; 'ö =ya kè 'ö -an =zuò' -yö za dɔ -an -bha, ²⁵kò -an =zuò' 'gü -wun -nu 'wo -bin -sü 'ka 'fɛfɛdhö bhë =wa yö -dhɛpuudhɛ 'gü. -Kɔ bhë =nɛ 'ö =ya kaa 'ö mɛ -nu 'wo bhë 'wo -gblü -Zlan -wo 'dhiö -a -dhɔ kè -sü 'ka =woè' =nɛɛ: «'Wun gia- mü. -Zlan -yö ka ziën.»

'Wun -mɔ 'kuë -kɔ -së 'ö -Zlan -bha mɛ -nu ziën

²⁶'Wun mɛ 'a dho kan -a -ta zlöö, n dhegluzë -nu, ö tɔɔ: =Ya kè =nɛ 'ka 'dho ka 'ko =bhaa, mɛ =ya kè ka ziën 'ö 'tan =ya nu -a =zuò' 'piö, kö mɛ gbe -bha -yö kè mɛ =daan' -wo 'ka, kö mɛ 'waa gbe -bha -yö kè pè 'ö 'bin -sü 'ka 'ö - yö -a 'ka, mɛ -yö bɔ -de -a -bha -yö kè 'wun -blɛɛ -wo 'waa gbe 'gü -sü 'ka, -a mɛ 'bhaa -bha -yö kè -a -dhië -kwaä -sü 'ka 'ö 'ka dho -a kè, -a 'plɛ -yö kè ka -zo -gban -pè 'ka. ²⁷'Ö =ya kè =nɛ mɛ -nu =wa kè -dhö kö -waan 'wun =blɛɛ' -wo gbe 'gü, kö -wo kè mɛ =plɛ 'iin mɛ -yaaga 'ka, 'kɛɛ kö -a -dhië -kwaä -sü -yö kè -dhö; mɛ 'ö -dhö, -yö yö mü do do 'ka. ²⁸'Ö =ya kè =nɛ mɛ 'yaa -dhö kö -wo -nu bhë -yö -an -gen pö, kö mɛ 'ö -dhö -yö =bhea' -wo =löö ö -de 'sloo ö -bha 'ka -Zlan -dhë; kö -kun 'ö -wo -yö yö plaan mü. ²⁹Kè =nɛ =ya 'to -Zlan 'dhiwopöme -nu -bha, -wo kè mɛ =plɛ 'iin mɛ -yaaga 'ka kö -wo 'wun =blɛɛ' -wo -ta; kö mɛ -nu 'wo to, -wo wo 'to 'to -a -bha -wo -dhe -ga -a 'piö. ³⁰'Ö mɛ =ya kè mü 'pö 'ö -Zuu 'slööslö =ya 'wun bho -bin -blü -a -dhë kö -yaan -a =blɛɛ', kö -yö dɔ mɛ 'ö 'dhiö bhë -yö yën ö -bha -bha. ³¹-Yö kè 'dhö kö ka 'plɛ 'kaan- -Zlan 'dhi -wo pö, mɛ do -yö yö mü; =ya yën 'ö mɛ 'waa gbe -yö yö mü 'pö kö mɛ 'plɛ -waan -a ma kö -an =faan' -yaan 'më. ³²Mɛ 'ö =ya kè 'wo -Zlan 'dhi -wo pö -na bhë, -an =dua' -mü kö -wo kè 'wun 'ö dɔ -an 'dhi bhë mɛ 'ö 'wo- 'kun -kɔ dɔ -an 'ka; ³³'ö tɔɔ -Zlan yaa kwa -dhɔɔ kè kö 'kwaan- pè -nu kè -kungkuédhɛ -kwaä; 'kɛɛ kö -yö kè =zian' =zuöyagluu 'gü.

-Ka -dhe -ga 'dhe! =Ya kè Yesu -wun -dhe 'wun gia- -mɛ -nu ziën, -dhe 'saadhö 'gü -kɔ 'ö kè -na -a 'ka ³⁴dhebo -nu 'piö =zian' 'ö tɔɔ -ya 'wo- wo diindhö. 'Yaa -së -an -bha 'ka kö -wo 'wun -nu =blɛɛ' -bhɔkuédhɛ -nu 'gü; -wo kè dhoo -nu 'wo wo =gɔ dho sia- wo =gɔn -nu -dhë -an 'ka =nɛ -kɔ 'ö -Zlan -bha tɔng -ya pöë bhë -a 'dhö. ³⁵=Ya kè =nɛ -dhɛɛkpɔdhe -ya kè -an -gɔ 'wun 'bhaa -bha, kö -wo wo =gɔn -nu -dhɛɛ' 'kpɔ kɔɔ =zian'. 'Yaa -së dhebo -bha 'ka kö -yö 'wun -nu =blɛɛ' -bhɔ 'kuë- -nu 'gü.

³⁶'Ö bhii ka gia-, -ka -dhe -ga bhë! Yaa kè =nɛ -Zlan -wo 'ö bhë -dhe 'ö ka =plöö 'ma bhë =nɛ 'ö -wo -a -bha 'iin ka -de 'sloo =nɛ 'ka- yö. ³⁷'Ö =ya kè =nɛ ü -Zlan 'dhiwopöme 'ka 'iin gbaɔ 'ö go -Zlan 'piö -yö ü -gɔ kö 'wun -nu 'a- =blɛɛ' -na 'sëédhɛ =nɛ -a 'gü bhë -yö kè ü 'yaan =nɛ, -yö tɔng 'ö kwa Dëme -ya dɔ -a 'ka. ³⁸Mɛ 'ö 'yaa- =bhlë -ya, kö mɛ bhë kö =kun 'ö 'ka- -ga ka kpö 'gü -mɛ 'ka.

³⁹N dhegluzë -nu, =ya kè 'dhö kö pè mɛ 'ö 'ka dho -ya -a =wuën' 'ö tɔɔ kö 'kaan- -Zlan 'dhi -wo pö. 'Kɛɛ kè- wo 'dhö bhë, =kun -kè 'ka- pö -an -dhë kö =kun 'wo 'wun =blɛɛ' -wo gbe 'gü. ⁴⁰Pè 'ö 'ka dho -a kè, -yö kè -a kè -kɔ 'ka, -yö kè ö pin =taa.

'Wun 'ö -gban Klito -bha -go ga 'sü -sü -bha

15 ¹N dhegluzë -nu, a ka -zo -büö -na 'zü 'wuntaasë 'a- -blæ ka -dhë 'ö 'ka- -wun -dhe 'wun gia- 'ö ka -bha -zo yö -sü -yö -gban -a -ta genngdhö bhë -a 'ka. ²Yö =ne 'ka bɔ -a -ta 'ka dha, kö =ya kē =ne 'ka- 'kun =ne -kɔ 'a- =blæ -a 'ka ka -dhë bhë -a 'dhö. =Ya kē =ne 'yaa 'dhö kö ka -bha 'wun -dhe 'wun gia- -sü bhë -yö 'flëë.

³Mε =daan' -wo 'ö bhë =ne 'ö 'a- -wun =blæ ka -dhë kö 'ma- yö; yö =ne 'ö- -wun 'dhö 'gbee-, 'ö tɔɔ Klito -yö -ga kwa -bha =sɔɔn yaa -nu -wun 'gü =ne -kɔ 'ö- 'ka =bæen' -sü 'ka -Zlan -bha 'sëedhe 'gü bhë -a 'dhö. ⁴'Wo- -bin; yö go ga 'gü -dhekpaɔyi kē -yaaga -naa 'ka =ne -kɔ do 'ö =bæen' -sü 'ka -a 'ka -Zlan -bha 'sëedhe 'gü bhë -a 'dhö; ⁵yö ö -de -zɔn Pïε -dhë, 'ö Pïε -ya yö; 'go mü 'yö ö -de -zɔn =guë' -nu 'gɔɔ- do ö ga =plε 'wo bhë -an me -nu 'wo to bhë -an -dhë. ⁶=Dhe =ya 'go mü, 'yö ö -de -zɔn ö -wun -dhe 'wun gia- -mε -nu 'wo dho -mɔ mε -lü -këng' 'sɔɔdhu -bha -an -dhë -dhe do 'gü. -An mædhvadhe -wo =tun -dhö. ⁷-Yö ö -de -zɔn Zakö waa- ö -bha bɔme -nu 'saadhö 'wo to bhë -an -dhë.

⁸=Dhe =ya 'kan -an -bha, -yö ö -de -zɔn n -dhë 'pö; 'kεε kö ma 'a bhë n =tɛi' -yö -kē =ne 'në 'ö yaa bho ö bho 'töng 'ka -a 'dhö. ⁹Bhii Yesu -bha bɔme -nu 'wo bhë ma =ne 'a tɔɔ mε -kaanta, 'ö 'wun gia- 'ka, n -dhe Yesu -bha bɔmε -sü -de 'ö bhë yaa n -ma 'kun; 'ö tɔɔ mε -nu 'ö 'wo Yesu -wun -dhe 'wun gia- -mε 'ka bhë, a -kē 'wun 'gbee- -kē -an 'ka -mε 'ka. ¹⁰'Kεε -Zlan -bha 'glusë 'gü, ma =ga 'ö 'ma kē =ne -kɔ =ne -a 'dhö bhë; 'ö 'glusë 'ö- -kē n 'ka bhë, 'ö- 'gü -pë yaa 'to 'kpaan. 'Ö tɔɔ a yuö -kē 'a -ziö -a 'ka -an 'plε -ta; 'kεε kö kwa -dhe -ga -a 'gü -së 'ka, -Zlan 'glusë 'ö n -ta bhë =ne 'ö yuö -nu bhë 'ö -an -kē. ¹¹=Ya kē 'dhö kö 'wun bhë -a -bha -go n kwεε -sü 'iin -a -bha -go Yesu -bha bɔme -nu mε 'wo to -an kwεε -sü bhë yö kun 'ö- -wun 'dhö 'gbee-. Pë mε 'ö -dhö 'ö tɔɔ 'wun 'yi- =blæ' -'ö 'ka- -wun -dhe 'wun gia- bhë.

'Wun 'ö -gban -go ga 'gü -sü -bha

¹²Pë 'ö yi- =blæ' -na 'ö tɔɔ Klito -yö -go ga 'gü 'kεε kö mε 'bhaa -nu -wo ka ziën 'ö 'wo- pö -sü 'gü =ne -go ga 'gü -sü 'yaa -dhö, -yö -yö ka -gɔ =dhë =ε? ¹³=Ya kē =ne pë 'wo- pö bhë -yö 'wun gia- 'ka, kö Klito yaa 'go ga 'gü =ne bhë 'sa! ¹⁴'Ö =ya kē 'pö =ne Klito yaa 'go ga 'gü, kö 'yaa yi -bha 'yi yi -de kē 'wun =blæ' - mε 'ka; kö ka -bha 'wun -dhe 'wun gia- -sü bhë -yö 'flëë ('ö bhii yi =ne 'yi- pö ka -dhë Klito -yö -go ga 'gü, 'ö 'ka- -wun -dhe 'wun gia-). ¹⁵-A -de 'kö -kē =ne -yö 'dhö, kö pë 'ö -Zlan yaa- kē bhë, 'yië kē -a -wun -dɔ -a -bha -mε 'ka; 'ö tɔɔ yi- -pö -Zlan =ya Klito bho ga 'gü 'kεε kö yaa- kē 'dhö, kö =ya kē =ne 'kwa 'to -a -ta =ne mε -nu 'ö =wa ga bhë, 'waa 'go ga 'gü 'gbeedhö. ¹⁶'Ö bhii =ya kē =ne -dhe 'kwa- -ga -a 'gü -së 'ka bhë, mε -nu 'ö =wa ga bhë 'waa 'go ga 'gü, kö Klito -de 'pö yaa 'go ga 'gü =ne bhë 'sa. ¹⁷'Ö =ya kē =ne Klito yaa 'go ga 'gü, kö ka -bha -zo -yö -Zlan -bha -sü bhë

-yö 'kpaan, 'iin kö ka -tun ka -bha -sɔɔn yaa 'gü -ne bhë. ¹⁸-Ya kë 'dhö, kö me -nu 'wo ga -zo -yö Klito -bha -sü 'gü bhë kö waa dha -ne bhë 'sa! ¹⁹Kö kë- wo bhë, =ya kë -ne kwa -bha -zo -yö Klito -bha -sü 'ö bhë, pë 'ö- 'dhiö dho to 'kpongtaa zö yö -mü, kö kwa 'kwa tɔɔ me -nu 'wo 'kpongtaa zö -an 'yenazë.

²⁰'Këe kë- wo 'dhö bhë, 'wun gia- -mü -ne Klito -yö -go ga 'gü, 'ö -këdhösü -yö -kë -a -gɔ -a -zɔn -sü 'ka -ne me -nu 'wo ga bhë, wo -de 'pö -wo -dho go ga 'gü. ²¹'Ö tɔɔ -kɔ do 'ö ga -yö bɔa me do 'gü 'ö =daa' 'kpongtaa zö bhë -ne 'ö game -nu -bha -go ga 'gü -sü -yö bɔa me do 'bhaa gbë 'gü 'pö. ²²-Kɔ do 'ö me -nu 'saadhö -an -bha -kë Adan =suu'- 'ka -sü -wun 'gü, 'ö 'wo ga -a 'ka bhë -ne 'ö me -nu dho go -a 'ka ga 'gü -an -bha -klu Klito -bha -sü -wun 'gü. ²³'Këe kö me 'ö -dhö, -a -bha -dɔdhe -yö -dhö. Klito =ne 'ö me -bleezë 'ka me 'ple -ta; =ya 'go mü, me -nu 'wo Klito -bha 'ka, 'wo yö mü -a nu -yi 'ka. ²⁴=Ya 'go mü zlöö 'ö yi -kaanta -yö -lo. Yi bhë -a 'ka, Klito -dho -wogbiindhe -nu, -kɔ -mɔ 'wuën- -sü waa- 'piigbeedhe -nu -an 'ple 'gü =siö'- =Ya kë 'dhö, 'ö -gludëdhe kë -sü -lo ö Dë -Zlan kwëe. ²⁵'Ö tɔɔ -gbɔgbɔdhö Klito -yö -dhö -gludëdhe kë 'ö dho 'ö yöë -Zlan -bha -a -to -a yaagüme -nu -ta 'gbee- 'ka -sü, waa- -an -lo Klito -gen -löö -sü -yi -bha. ²⁶Yaagüme -kaanta 'ö Klito dho -a 'gü =siö'- 'ö tɔɔ ga. ²⁷'Ö tɔɔ pë 'ö =been' -sü 'ka -Zlan -bha 'sëedhe 'gü -ya -pö: -Zlan =ya pë 'ple -lo -a -gen =löö. 'Këe kë- wo 'dhö bhë yaa kë =ne -wo kpö 'ö -kë «pë 'ple 'saadhö» 'ka, 'ö 'kwa- pö bhë 'ö tɔɔ -Zlan 'ö pë 'ple -lo Klito -gen =löö bhë, yö -de 'pö -yö -dho kë Klito -gen =löö 'pö 'yaa -mü. ²⁸-Ya kë =ne pë 'saadhö 'ple -gɔ =ya 'dho Klito -dhë sia- =sia, 'ö Klito gia- -de 'ö -Zlan Gbö 'ka bhë, 'ö ö -gɔ dho sia- -Zlan 'ö pë 'ple -lo -a -gen =löö bhë -a -dhë; kö -dhe 'saadhö 'gü -Zlan -yö -ya pë 'ple -gɔ -ta.

²⁹-Ka -dhe -ga bhë 'dhe! Me -nu 'wo -an 'më -na yiö Yesu 'tɔ 'gü me -nu 'ö =waa- wo 'ö =wa ga -an pin =taa bhë, -ka ka -zo 'ta -an -wun 'gü! Pë -nu 'wo- kë -na 'dhö bhë -a -yö -a -bha -pë -dho kë -më 'ka ëe? 'Ö =ya kë -ne me 'ö =wa ga bhë 'waa go ga 'gü kö -më -kë 'ö 'wo bɔ yö -an piën =ëen? ³⁰=Ëë, =ya kë 'dhö kö -më -wun 'ö =ya kë 'yi yi -de -da -a -dhë 'wun 'gbee- 'gü 'töng 'saadhö 'ka =neë? ³¹N dhegluzë -nu, a- -pö ka -dhë, yi 'saadhö 'ka, 'wun =wa bɔ -a -ta 'wo ga bhë, a -bɔ -a 'gü; (-yö kë ka 'yaan -ne,) -a pö 'a- wo 'dhö bhë 'ö tɔɔ n -ma -kë 'gɔgɔ -sü bhë -a -gen -yö -gban ka 'gü, ka -bha -kë kwa Dëme Yesu Klito -bha zian -ta -sü -wun 'gü. ³²'Ö =ya kë =ne me =wa ga, 'waa 'go ga 'gü gbɔ, kö -Zlan -wo -ta -ko 'a- zë Efezö -pö =ne -a 'gü =ne me pë zë wü 'dhiö -nu 'ka bhë, -a =truën -dho kë -më 'ka ëe? 'Ö =ya kë =ne 'ko =suu'- bhë, a- -zë 'kpongtaapë -wun 'gü kö -a zë -gen 'yaa 'dhö. =Ya kë 'dhö kö a -dho -a pö 'pö 'wun =zuan' 'ka =neë: «=Dhe 'ö -kë =ne kwa ga -wun -yö -dhö =dhia' bhë, kö -kwa pë -nu -bhö, 'kwa yö -nu mü 'sa!» ('Ö bhii -go ga 'gü -sü 'yaa 'dhö kö 'kwaan- dɔ kwa -de -wun =zɔnng' -ta -dhekpaɔ =dhia' -bha.)

³³-Ka ka -zo kē ka -de 'piö, 'ö tɔɔ -ta 'kuē -mε yaa -yö me -gɔ bho zian -sē -ta. ³⁴Kö -ka ka -zo 'ta giagiawo 'wun -nu 'piö kö 'ka pē -nu kē -a kē -kɔ 'ka; -ka ka bo =sɔɔn yaa kē -sü 'ka e! -Ka -dhe -ga bhē 'dhe! Me 'bhaa -nu -wo ka ziēn 'ö 'waa -Zlan dɔ; 'wun bhē 'yaa ka -bha lē- -wun 'ka a?

Bun 'ö dho kē -gɔ ga 'gü -mε -nu -gɔ

³⁵-Dhe -kē 'dhö, 'wun bhē 'kwa 'to -a -ii -ta -nε game -nu -bha -go ga 'gü -sü bhē 'wun gia- -mü, kö -dhe 'ö -dheε' dho go mü bhē, kö -ya kē n 'yaan 'saadhö. Mε -dho kē mü 'ö- pö: «-Wo -go ga 'gü -kɔklē -ε? Bun -mlē 'wo dho go -a 'ka ga 'gü i?» ³⁶Mε 'ö 'dhö bhē 'wundɔdhe gbε 'yaa- -gɔ. 'Bha pēga -da 'seidhö, -a 'ke yaa 'bu, -a 'plüün 'yaa bhɔ, 'yaa 'dhö a? ³⁷Pēga 'ü- -da 'seidhö bhē, -yö -dho kē -mlüga 'iin pēga gbε 'kpaan 'ka, 'ö -ya kē 'ö bhɔ; yaa kē -nε -a 'nē 'ö yaa bhɔ -kun -nε ü- -da 'seidhö. ³⁸'Ö -ya kē 'dhö 'ö -Zlan -yö -a mε 'ö -dhö -a kē -kɔ 'ö dho kaa -a -nu -a -dhē -nε -kɔ 'ö- 'ka -a -dhē -sē bhē -a 'dhö. Pēga mε 'ö -dhö, -a bun 'ö- -ma kun -nε 'ö- nu -a -dhē.

³⁹'Tē -pē -nu 'kwa -an -ga -na 'saadhö bhē -an bun kē -kɔ 'yaa do. Me 'bhee- bun -yö -de -ta, 'ö wü -nu -bha -yö -kē -de -ta 'pö; -ma -nu -bha -yö -de -ta, 'ö 'yuö- -nu 'wo yiö 'ö -an -bha -yö -kē -de -ta 'pö.

⁴⁰Pē -nu -wo -dhö dhang- 'gü, 'ö -an bun 'dhö -dhö, 'ö pē -nu 'dhö -dhö 'kpongtaa. 'Kεε kē- wo 'dhö bhē pē -nu 'wo dhang- 'gü bhē -an bun -bha -sēdhe -yö -de -ta; 'ö 'kpongtaapē -nu -bha 'dhö -de -ta. ⁴¹Lan- -bha -sēdhe -yö -dhö, 'ö 'dhö -de -ta 'sü -zē 'ka. 'Ö 'susongga -bha 'dhö -de -ta; -a -de 'susongga -nu 'wo bhē, -a mε 'ö -dhö -yö -de -ta.

⁴²-Kɔ do bhē 'ö dho kaa -go ga 'gü -yi 'ka. -Wa 'dho mε bun 'ka -waa- -bin, kö mε bhē -ya ga; yi 'ö dho go -a 'ka ga 'gü bhē -ya -lo, kö -ya kē zlöö mε 'ö 'ö 'ka 'dho ga gbɔ -a 'ka. ⁴³-Wa -da 'seidhö kö -ya kē ya 'iin kö -faan' 'yaa- -gɔ gbɔ. 'Kεε -a -bha -go ga 'gü -yi 'ka, -yö -dho kē -sē 'ö- 'gü -yö -kē 'gbεε-. ⁴⁴-Wa -da -na 'seidhö -a bun 'ö- -gɔ bhē 'ö tɔɔ bun 'ö -ya kē 'ö- 'gü -yö -siö-, 'ö 'kpongtaa zö. 'Kεε -ya 'go ga 'gü, -yö -kē bun 'ö go -Zlan 'piö -a 'ka. -Ya kē 'dhö kö bun 'ö 'kpongtaa zö, -yö -dhö, 'ö- mε 'ö -Zlan 'piö 'pö, 'ö -dhö. ⁴⁵Bhii pē 'ö -been' -sü 'ka -ya -pö: Mε -blεεzē 'ö -da Adan 'ka bhē, 'tē -sü -yö -nu -a -dhē 'ö -kē 'bhee-. 'Kεε Adan mε 'ö nu zlöö bhē, -Zuu 'ö -kēdhösü nu mε -nu -dhē, yö -mü -a 'ka. ⁴⁶Mε 'ö go -Zlan 'piö bhē kun 'ö nu 'dhiö, 'kεε -a mε 'ö go 'kpongtaa zö bhē yö -nε 'ö yö 'dhiö; -ya 'go mü 'ö mε 'ö go -Zlan 'piö bhē 'ö yö -mü. ⁴⁷Mε -blεεzē 'ö -kē bhē -yö -kē 'sε 'ka, 'kεε mε kē -ple -naa bhē -yö -go dhang- 'gü. ⁴⁸Mε -nu 'wo 'kpongtaadhe -bha 'ka bhē -wo -kē -nε mε 'ö -kē 'sε 'ka -a 'dhö. 'Ö- mε -nu 'wo dhang- 'gü -dhe -bha 'ka bhē, 'wo -kē -nε mε 'ö go dhang- 'gü 'pö -a 'dhö. ⁴⁹-Kɔ do 'ö 'kwa bhɔ -a 'ka mε 'ö 'kpongtaa -a -bha bhē, 'ö 'kwa dho bhɔ -a 'ka mε 'ö go dhang- 'gü bhē -a -bha 'pö.

⁵⁰N dhegluzē -nu, 'wun 'a- 'piö kö 'a- pö 'ö tɔɔ: Bun 'ö kwa -gɔ 'kpongtaa zö 'ö -kē -nēng waa- fei -an 'ka bhē, 'ö 'ka 'dho -da -Zlan -bha -gludēdhe

-pö 'gü; 'iin pë 'ö gapë 'ka waa- pë 'ö 'yaa gapë 'ka waa -mɔ -a -bha kö -wo kë wo 'ko -bhaa.

⁵¹-Ka dɔ, 'a 'dhe bho -bin -wun do -ta ka -dhë 'dhe: Mɛ 'plɛ kwa 'ka 'dho ga; 'kɛɛ pë dho kë 'ö tɔɔ kwa 'saadhö kwa -dho =dhië' -kwa bun gbɛ 'gü. ⁵²-Yö -dho kë =nɛ -dhe 'wo wo 'yan zë -a -bha -a 'dhö, 'truu -kaanta -bha 'we -sü 'ka. 'Ö tɔɔ 'truu bhë =ya 'we, game -nu -dho go ga 'gü, -waan =dhië' -kwa bun 'ö 'yaa ga bhë -a 'gü; 'kɛɛ kwa -zë, vin 'kwa dhoë- wo kö 'kwa =dhië' -kwa 'saadhö. ⁵³Bhii 'ö tɔɔ pë 'ö gapë 'ka bhë, -yö -dho pë 'ö 'yaa ga bhë -a -da ö -bha 'iin kö pë 'ö dho bu 'sɛ =kwa' bhë, -yö pë 'ö 'ö 'ka 'dho bu bhë -a -da ö -bha (=nɛ -kɔ 'ö sɔ 'dhö kë -na -a 'ka mɛ bun -bha bhë -a 'dhö). ⁵⁴Ya kë =nɛ pë 'ö gapë 'ka bhë =ya pë 'ö 'yaa ga -a -da ö -bha, kö pë 'ö 'bupë 'ka -yö pë 'ö 'yaa 'bu -a -da ö -bha, -a yi bhë -a 'ka =nɛ 'ö pë 'ö =bɛɛn' -sü 'ka -Zlan -bha 'sëédhe 'gü bhë 'ö- -de 'dhiö dho -mɔ -a 'ka 'kuë. Bhii -yö =bɛɛn' -sü 'ka mü =nɛ: Ga 'gü =ya =siö'; -këdhösü =ya 'to -a 'gbee- 'ka ga -ta. ⁵⁵'Yö, ga, -to -a 'gbee- 'ka -sü 'ö -kë ü -gɔ bhë =ya dho 'më 'ü dɔa bhë =ɛ? Ü -bha pë 'ü bɔ -na -a -ta 'ü mɛ -nu zë -na -a 'ka bhë =ya 'to 'më =ɛ? ⁵⁶Ga -bha pë 'ö bɔ -na -a -ta 'ö mɛ -nu zë -na -a 'ka bhë 'ö tɔɔ =sɔɔn yaa. 'Ö =sɔɔn yaa -de 'pö, 'ö- -bha -kɔ -mɔ 'wun -bha -sü -yö -kë -dhö tɔng -bha -këdhösü -wun 'gü. ⁵⁷'Kɛɛ -Zlan 'tɔ- kë =va, bhii 'ö tɔɔ -yö -to -a 'gbee- 'ka -sü -nu kwa -dhë =sɔɔn yaa -ta =bɔa' kwa Dëmɛ Yesu Klito -ta -sü 'ka.

⁵⁸=Dhe 'ö 'pö, n dheglu -wungbeezë -nu, -ka dɔ gɛnngdhö, kö -kun 'ka 'zëzë kun! -Ka kë 'siözë, 'ka kwa Dëmɛ -bha yuö kë! 'Kɛɛ kë- wo 'dhö bhë, -yö kë ka 'yaan =nɛ yuö 'ka- kë -na kaa- kwa Dëmɛ -nu ka -bha -klu 'kuë- sü -wun 'gü bhë, yaa 'dho to 'kpaan.

-Zlan -gbaapë 'ö -kë dhegluzë -nu 'wo Zeluzalemë -an -bha 'ka

16 ¹'Wun 'ö -gban -Zlan -gbaapë 'ka- kë -na -Zlan -bha mɛ -nu 'wo Zeluzalemë -an -bha 'ka -a -bha bhë, a -dho paa; 'ö tɔɔ -kaa kë =nɛ -kɔ 'ö -Zlan -bha mɛ -nu 'wo Galatö -sɛ 'gü 'a -an =daan -a 'ka 'ö 'wo- kë -na -a 'ka bhë -a 'dhö. ²Kö mɛ 'ö -dhö, =glooyi 'ka, 'wëü- 'ö dho -mɔ -a -bha kö -yaan -a nu, =ya =waannu -de -ta ö -gɔ kɔɔ, -yö kë 'pö kö -kun 'ö 'ka dho -ya ma nu -sü -gɔ kö 'kaan- =tun kɔletö kë -süë! ³Ya kë =nɛ 'ma nu, mɛ -nu 'ö ka gia- 'ka -an -ya 'ö 'wo dho dho, a -dho 'sëédhe kë 'a- dɔ -an -gɔ, 'ö 'wo- kpa gbɔɔ -nu 'ka- -kë bhë -an -bha 'ö 'wo dho -a 'ka Zeluzalemë. ⁴'Ö =ya kë =nɛ n -ma 'dho -sü 'ö 'ma bhë, =ya 'to -a -bha, -wo -dho kpa n -ma 'ö yi -nu, 'yi nu.

**-Dhe -nu 'ö Pɔlö dho bɔ -a -bha waa- pë -nu
'ö dho -a kë -a yö 'ö- wo 'ko 'dhiö**

⁵A nu -na ka =plöö 'ma. 'Kɛɛ kë- wo 'dhö bhë, a -dho bɔ Maseduanë 'aan- =tun nu -na 'ma. ⁶A -dho 'tɔng kpö 'bhaa kë ka 'piö 'ma; -a -de 'ö =ya kë -to -a -bha -pë 'ka, a -dho -kpɔɔ 'tɔng 'plɛ kë 'ma, -yö kë 'dhö kö -dhe

-nu 'a dho bɔ -a -bha bhë, -an -zian -nu, 'yi 'kan -kɔ -nu 'wo bhë 'kaan- 'slë 'bhaa -nu -yö 'ko 'dhiö kè n -dhë. ⁷Ö tɔɔ 'maa- 'piö kö 'a ziö ka -ta 'vüdhö. -Yö n -zo 'piö kö 'a 'töng kpö 'bhaa kè ka 'piö 'ma 'kɛɛ kö -ya kè kwa Dëme -we -a -bha -wun 'ka.

⁸Kɛɛ kè- wo 'dhö bhë, a- 'piö kö 'a 'to Efezö zö, kö -yö 'dho -yö yöë Pantëkɔtö yi -bha. ⁹Ö tɔɔ 'kò -kè -nɛ n yaagüme -nu -wo zö -va, 'töng -së -yö n 'dhiö kö 'aan- kwa Dëme -bha yuö -va kè.

¹⁰-Ya kè -nɛ Timote -ya nu 'ma, -kaa -nia 'kun -së 'ka kö -yö kè ka 'piö -nɛ -kɔ 'ö dho kaa ö -de plöö -a 'dhö; 'ö tɔɔ kwa Dëme -bha yuö do 'a- kè -na -nɛ, 'ö- 'dhiö 'pö bhë. ¹¹-Ya kè 'dhö, -kun -kè 'ö mɛ -yö 'yan -ziö' -kaa! -Kaa kè -zian' kö -yö 'to -zuöyagluu 'gü, -a -së -yö nu -yö -lo n -ta 'nö bhii dhegluzë mɛ -nu 'ö 'wo 'nö, yi -nu 'plɛ yi 'yan -ya -gɔ zian-.

¹²-Ya kè kwa dheglu Apolɔsö -bha 'ka, a n -wo -bho 'kuë- -a -dhë kö waa- dhegluzë 'bhaa -nu -waan nu ka 'piö 'ma; 'kɛɛ -ya 'piö kö 'ö ö 'bhle dɔ -kun pë 'tee wo. 'Kö -kè -nɛ -yö -kè 'pö 'dhe, 'töng -së -ya -lo -a -gɔ -sia, -yö -dho nu.

-Wo -da -wo -nu -kaanta waa- =wekadhe -nu

¹³-Ka -ya ka 'yaan; -dɔ genngdhö -sü -yö kè ka -gɔ ka -bha -zo yö -sü 'gü; -ka kè -faanzë; 'gü -dɔ 'gbee- -sü -yö kè ka -gɔ! ¹⁴Pë 'saadhö 'ka dho -a kè, -yö kè -dho 'gü.

¹⁵Ka gia-, ka Sefanasö waa- ö -gɔ 'kɔɔmɛ -nu -dɔ, 'ö 'ka- -tɛi' dɔ -nɛ wo -nɛ 'wo -kè mɛ -blɛzë -nu 'ka Glekö -sɛ 'gü, 'wo Yesu -wun -dhe 'wun gia-, 'ö go mü 'wo yö yuö kè -süë' -Zlan -bha mɛ -nu ziën. -ɛɛ, -dhe 'ö 'dhö, a- -dhe ka -gɔ, n dhegluzë -nu, ¹⁶mɛ -nu -suu' -'wo 'dhö bhë waa- wo -bha mɛ -nu 'ö wo -nu 'wo -Zlan -bha yuö kè -na wo -zuö' 'plɛ 'ka bhë, -ka ka -kwaal- -an -zü -wo 'dhiö 'sü ka 'ka!

¹⁷Sefanasö 'dhö, Fɔɔtunatusö 'dhö waa- Akaikusö -an -bha nu -sü 'ö bhë -yö n -zuö' 'glu -dhi bhii kaa kè n 'piö 'nö bhë, pë -nu 'ö -an -wun -yö -kè n -ma 'nö bhë, -wa 'plɛ kè n -dhë; ¹⁸kö -ya kè kwa 'plɛ kwa -zuö' -dho sia- -wun 'ka. Mɛ -suu' -nu 'wo bhë -nɛ 'ö -an -wun 'yi dho kan ka 'dhi.

¹⁹-Zlan -bha mɛ -nu 'wo Azi -sɛ 'gü -wa 'we kaa! Akilasö 'dhö, Plisilö waa- -Zlan -bha mɛ -nu 'ö -ya kè 'wo -bho 'kuë- kè -na -an -gɔ kɔɔ -wa 'we kaa -duö Yesu Klito 'tɔ 'gü. ²⁰Dhegluzë -nu 'wo n 'piö 'nö wo 'saadhö -wa 'we kaa! -Ka ka 'ko -nu -tua bho ka 'ko -nu 'sene bho -sü 'ka dhegluzë -dhe 'gü.

²¹=Wekadhe -bɛɛn' -yan mɛ 'ö -nɛ ma Pɔlö, ma -de gia- n -kɔ pin -mü: 'Ma 'we kaa -duö!

²²'Dhangga -yö 'kpɔ mɛ 'ö kwa Dëme -dho 'yaa- -bha -a 'ka! -Kwaa pö: «Malanata!» (=Waa- pö 'dhö Alamie -wo 'gü kö -wa -pö: «Kö 'go kwa Dëme -yö nu!»)

²³Kö kwa Dëme Yesu -bha 'glusë -yö 'to ka 'piö.

²⁴('Ma 'we ka 'saadhö ka 'ka,) ka -dho 'ö n 'gü bhë -a -paa' kwa Dëme Yesu Klito 'gü.